

F

III



36809/p

F. VIII

DISPUTATIO MEDICA  
INAUGURALIS.

DE  
MORBO TSÖMÖR HUNGARIS  
ENDEMIO,

QUAM  
ANNUENTE DEO OPT. MAX.

*Ex Auctoritate Magnifici Rectoris,*

D. ANTONII SCHULTINGII,  
J. U. D. ET ANTECESSORIS ORDINARI.

NEC NON

*Amplissimi SENATUS Academici Consensu, & Nobilissima Facul-  
tatis MEDICÆ Decreto,*

PRO GRADU DOCTORATUS,

Summisque in Medicinâ Honoribus & Privilegiis  
ritè ac legitimè consequendis,

*Publico ac solenni Examini submittit*

JOHANNES MILLETER, *Igloviâ Hungarus.*

*Ad diem 18. Junii 1717. horâ locoque solitis.*



LUGDUNI BATAVORUM,

Apud CONRADUM WISHOF, 1717.

PERILLUSTRI AC GENEROSO  
DOMINO,  
DN. PAULO LANYI,

INCLYTI COMITATUS GÖMÖRIENSIS EME-  
RITO VICE COMITI, NEC NON EJUS-  
DEM APPELLATIONUM PRIMA-  
RIO JUDICI, ETC.

DOMINO AVUNCULO SUO GRA-  
TIOSISSIMO,



SPECIMEN HOCCE ACADEMICUM  
IN OBSERVANTIÆ ATQUE GRA-  
TIANIMI SYMBOLUM DICAT ET  
CONSECRAT

AUTHOR




# DISPUTATIO MEDICA INAUGURALIS,

DE

## MORBO TSÖMÖR HUNGARIS ENDEMIO.

### PRO O E M I U M.



*Ræclarè cecinit Poëta Æneid. Lib. vi.*  
Quisque suos patimur Manes; quod non  
minus circa res medicas, quam alias suf-  
fragantem habet veritatem. Testantur il-  
lud abundè humanæ vicissitudines ac mor-  
borum insultus diversi, magisque vel mi-  
nus familiares, non solum pro tempera-  
mentorum, ætatum, vitæ generis, sexus,  
anni temporum differentia; sed & loco-  
rum in quibus nascimur vel vivimus va-  
rietate:

*Hinc aliis aliis semper locus est inimicus*  
*Partibus: Ad balthum scorbutus in oribus urit:*  
*Turgida sic collo dependet struma Sabaudis,*  
*Alpinisque viget: siccum, sic phthisis, Iberum*  
*Fortior insurgit solitò detrudere nisu:*  
*Ungariamque febris comburit certa: Calore*  
*Anglia sic sudat proprio: Venerisque malignus*  
*Indorum morbus deturpat viscera: & instat*  
*Austriacis nodosa pedes tardare Podagra.*

*Sicque plicat variè tricis Ciragra Polonos. quales plures in Disserta-  
tionibus suis eruditis exhibent morbos Celeberrimi in arte medica Viri*  
*F. Hoffmannus de Morbis certis regionibus & populis peculia-*



ribus & Rivinus de Morbis endemiis. *Nec regiones solum aut integræ provinciæ subiectæ sunt certis quibusdam morbis, verum particularia quoque loca nonnulla peculiare suos fovent morbos. Sic Liber Baro de Valvasor in descriptione Carniolæ sub Titulo: die Ehre des Herzogthums Crain in publicum emissa Lib. III. p. 323. notat maculam quandam nigram lentis magnitudine variis in corporis partibus spectabilem v. g. Pectore, dorso, artubus, quæ ante eruptionem pruritum excitet, rusticis in certis particularibus Carniolæ locis: (auß den Karst / und an den Poick / desgleichen im Vipacher Boden :) familiarem esse, quam iidem frictione forti cum allio profligent, asserentes sine frictionis usu hominem in spatio 2. aut 3. dierum eâ succumbere debere: Testaturque in superiori & inferiori Carniola nihil de hoc morbo observari. Notitiam hujusmodi endemiorum morborum, uti usu suo medico minimè carere facilè quisque artis medicæ gnarus annuet, ita jam Hippocr. Libr. de Aer. loc. & Aquis medicis eam ceu utilem commendavit. Non sufficit verò solum scire, quinam peculiare morbi, vel qui frequentius aut rarius in hoc vel illo loco & qua de causa occurrant, sed interest etiam novisse, quid peculiare in hoc vel illo loco respectu benignioris vel malignioris indolis, aut aliarum circumstantiarum hic vel ille morbus, præ aliis locis gerat? quænam remedia chirurgica æque atque pharmaceutica magis vel minus tuto diversis in locis ex usu sint, calidiora magis vel temperata? alterantia vel evacuantia, & quæ ex his in genere magis proficua, fortiora item vel mitiora, majori vel minori dosi data, esse soleant? differunt enim secundum Celsum in præfat. Lib. de Medic. p. 8. genera Medicinæ pro natura locorum, aliudve opus est Romæ, aliud in Ægypto, aliud in Galliis &c. sic febrem semiter-tianam, quæ alibi rarè in malignam transit, Romæ magna ex parte valdè periculosam esse scribit Bagliv. L. 1. Prax. Med. c. 15. Longior, & difficilior est curatio paralytis scorbuticæ Embdæ, quam Hamburgi, teste Severino Eugaleno in libro suo de Scorb. p. 99. In Hispania vulnera capitis summè periculosa esse Jungken Chir. Man. p. 81. refert. Coberus Vestphalis fortiora, Svevis. mitiora purgantia propinanda esse annotavit D. III. obs. 2. in Schol. Volffgangus Höferus in Herc. Med. L. 8. c. 2. monet Bavaros levissimis, Hungaros non nisi fortissimis purgari, fœminasve Hungaricas, ut & Austriacas prægnantes Bals. Embryonis ceu nimis*



*calidum offendere. Galli trepanum feliciter, Dani minus ferunt, teste Bartholino. In Gallia sutura tendinum vulneratorum, operatio Bubonocetes & curatio ulcerum chironiorum feliciter succedunt, contra in Aere Romano secundum Bagl. c. l. Sic Holler. comment. in Aph. 2. Sect. 1. Hippocr. scribit Narbonenses Medicos reprehendere Parisinos, tanquam ad aperiendam venam audaciores, Parisiis tamen facile phlebotomiam ferri; Quæ, ut alia mittam, cum ita sese habeant, totus in eo eram, ut quid in Patria circa has res obtineat, cognoscerem; missis itaque compluribus quæstionibus medicis de rebus utilibus & necessariis mihi visis ad modernos nonnullos Patriæ nostræ Practicos, triplex Responsum à Celeberrimis nunc in Hungaria, doctrina non minus, quam felicitate in medendo & fama inclytis Practicis obtinui, videlicet Posonio à D. Carolo Rayger juniore Med. D. & Cellsi. Palatini Regni Hungar. Archiatro. Neosolio à D. Carolo Ottone Moller, Med. D. & Inclyti Comitatus Zoliensis, nec non Regiæ Liberæque Civitatis Neosoliensis Physico Ordinario. Ac Sopronio à D. Joh. Adamo Genfelio Med. D. Acad. N. C. Germ. Collega, & Civit. Soproniens. Physico Ordinario: quorum singularem erga me benevolentiam hoc ipso comprobata non possum non digno celebrare encomio: ex quibus excerpta quædam, dum de morbo Hungaris endemio ago, non inutilia, nec à præsentis tractatione prorsus aliena fore existimaui, si curiosi Lectoris in gratiam in fine Dissertationis annexerem, eâ bonâ fide communicando, quâ ipsos mihi scripsisse in literis suis testabantur. Dum autem Thema quoddam inaugurale mihi eligendum esset, primitus quidem constitueram apud Me de Febris vulgo dicta Hungarica agere, & cum in diversum abeuntes Authores eam pertractantes non solum in limite circa determinandum nomen & speciem febris, verum & circa symptomata, causas, Remedia offenderem, miseram denuo prolixas quæstiones ad supra memoratam Trigram Celeberrimorum Hungariæ Medicorum, sperans fore, ut obtento benigno Responso ab iis, facilius demum mihi innotescat, tum Natura ipsa hujus morbi, qualis in Hungaria deprehenditur, tum ratio Dissensus Authorum, cum aliàs difficile sit judicium, an causa veriùs rejici debeat in diversas Annorum constitutiones, vel diversitatem locorum, aut etiam medicamentorum adhibitorum differentiam: Mutandum tamen brevi fuit consilium, dum acceptis ex Pa-*



tria triplicibus literis, Parens & Amici dulcissimi quam proximum  
 urgerent reditum; cumque animus semper fuerit morbum aliquem  
 Hungaris adscriptum pertractare, in Morbo Csömör tandem aquievi,  
 cujus Nomen apud Hungaros receptum malui in Dissertationis titulo  
 eo usque usurpare, dum ex tradita genuina ejus Historia, quodnam  
 latinum ipsi magis competere videatur, innotesceret: Et cum Hun-  
 garis perpetuus quasi sit hic morbus, id est, omnibus annis, omni  
 annorum tempore affligens non unum, sed plurimos, Endemium eum  
 appellandum censui. Tametsi verò, ut hominum mores sunt, malè  
 forte audire possem à quibusdam, me hujusmodi morbum evolvendum  
 in me suscepisse, cujus curandi ergo rarò Hungari sollicitare soleant  
 Medicum, ii tamen meminerint popularem Hungarorum curationem  
 tanti non esse, quæ indubiè semper profliget morbum hunc, & pejora  
 prohibeat consecutaria, cum sæpe febres intermittentes, continuæ, &  
 ipsa febris Hungarica succedere soleant adhibitis licet eorum reme-  
 diis, cujus tamen tempestivè succisâ radice Morbi hi propullulare  
 minimè possent, unde jam Forestus L. i. de febr. c. i. in Schol.  
 eo ex capite reprehendit Medicos febris diariæ tractationem ceu beni-  
 gnæ negligentes, quod videlicet nonnunquam in periculosos transire  
 observetur morbos. Antequam autem ipsam tractationem aggrediar,  
 lubet paucis Authorum, qui de morbo hoc egerunt, & historiam  
 ejus tradiderunt, mentionem injicere: Coberus itaque primus esto,  
 cujus Decades tres Observ. castren. præcipuè autem prima sæpius  
 Languoris Pannonici, Hungaris (ut ipse Dec. i. obs. vi. in Scholio  
 dicit) Tschemmerle dicti (rectius tamen Csömör audit) mentionem  
 faciunt, tametsi verò Author hic pro aliis bonâ fide communicatis  
 laude sua defraudandus mihi minimè videatur, in eo tamen humani  
 quid passum ipsum esse suspicor, quod morbum Csömör à morbo Hungari-  
 co sive febre Hungarica, Hungaris Hagymáz, Germanis Haubt franckheie  
 dicta minus probè distinxerit, adeoque lectori facile inponat, ut quæ  
 symptomata huic competunt, illi promiscuè omnia ab eo consignata  
 tribuenda esse credat. Videtur equidem D. i. Obs. viii. p. 42.  
 Languorem ab ipso morbo Hungarico discernere, dum dicit: Nisi  
 tantis ictibus corpus jam purum satisque laudabilis constitutio-  
 nis concussum fuisset hunc tam gravem non amplius languo-  
 rem, sed morbum perfectè Ungaricum facile effugere potuisset,  
 & Dec. ejusdem Obs. x. p. 53. Plenis gressibus ad languores  
 pan-



pannonicos, in funestum tandem morbum terminandos deferrebar. &c. nihilominus aliis in locis, & cum primis p. 32. obs. VI. D. 1. binos hos morbos invicem miscet, dicens, Languorem Hungaric. Ao. 1566. insana prorsus rabie pestis instar in omnes grassatum esse, cum tamen cuilibet Jordanum Ao. 1566. in Hung. castrensem Medicum agentem, de Phænomenis Pestis. c. 19. evolventi liquido patere possit, eo tum non languorem Coberi Pannonicum, sed ipsam febrim vulgo hungaricam dictam tanta cum strage grassatam esse, ut taceam, quæ ibidem de contagio & internecone hujus languoris memorat, & obs. VI. D. 1. pag. 31. in schol. de Petechiis languori huic familiaribus, morbo Csömör nulla ratione tribui posse. Id insuper haud injuriè forsitan desiderari à Viro bono posset, ut luculentior & prolixior paulo Historiam morbi hujus Csömör tradidisset, cum præter obs. VI. & X. D. 1. pauca quædam tradita phænomena, in reliquis fere solo nomine Languoris Pannonici contentus fuerit, nisi in reliquis suis Decadibus (mentionem enim facit Decadis IX. in D. II. obs. 1.) defectum hunc suum supplere studuisset, quas tamen una cum Celeberrimo, dum viveret Meibomio in Præf. ad Decades III. obs. Castr. Coberianas mihi videre non licuit. Proximus Cobero sit Malachias Geigerus, qui in Microcosmo Hypochond: Monachii 1652. edito in IVto de morbo Tsömör quædam complectitur, quem cum nec in Saxonia, nec hic obtinere potuerim, verba ejus à D. D. Reimanno bonâ fide communicata in Historia morbi hinc inde citabo. Wolfgangus Hôferus junior pariter in Herc. suo Medic. brevibus mentionem hujus morbi facit p. m. 326. & D. Joh. Paterson Hain in Ephem. N. C. Ger. D. 1. An. 11. obs. 28. D. Samuel Köleséri denique de Kerefeer, Phil. & Med. D. Sacr. Cæs. Regiæque Majest. Rei Metallicæ per Transylvaniam Inspector, in Tractatulo suo de scorbuto Mediterraneo Cibiny in XII. edito Ao. 1707. genuinam magis & prolixior paulo morbi hujus historiam exhibet, qui tanto majorem laudem mereri mihi videtur, quò honestius semper duxi institutum, si quis patrias res studiosè investiget, & easdem memoriæ commendet, quam si quis peregrina sectando, ante pedes posita & quotidie oculis usurpanda despiciat, negligat. Ante 2. Annos prodiit Erfordiæ quoque Differ. Inauguralis de Languore Pannonico Authore Joh. Theophilo Windisch Amico & condiscipulo quondam meo



meo Jenæ, pleraque omnia tamen ad Historiam & causas hujus morbi facientia, si unum vel alterum excipias, quod à conterraneo nostro eo tùm Jenæ commorante sciscitando rescivit, ex Cobero mutuavit. Hi sunt de quibus certus sum, morbum hunc scriptis suis persequutos esse. Promisit equidem D. Carolus Raygerus Senior *Endemiorum, & Epidemicorum Hungariæ Libros 2.* in Præf. ad Pauli Spindleri obs. Medic. Centuriam, ubi haud dubiè, pro more suo eruditè, de morbo Tsömör quoque commentatus fuisset, sed cum nec ex Patria, nec ab eruditis exteris vel Bibliopolis compertum habere possim, an typis evulgati sint, suspicione moveor, præmaturam forte mortem laudabilibus Viri hujus conatibus obstitisse, & editionem suspensam mansisse. Præter horum verò Authorum de morbo Tsömör annotata phænomena, in Responsionibus supra memoratorum D. D. Raygeri Junioris, Molleri, Genselii communicata, non minus, quæ à Fautoribus & Amicis meis integerrimis D. Joh. Adamo Reimanno Med. D. & Præct. Eperienti, nec non D. Adamo Bacsmegyí Inclýti Comit. Gömörien: Physico Ordin. per literas accepi, ut & quæ à Conterraneis Vittenbergensibus, Hallens. Jenens. hujatibus expiscari potui, Historiæ morbi inseram, citatis inferius breviter Authoribus. Faxit Divinum Numen, ne in evolvendo hoc morbo caligent oculi, & à veritatis tramite deflectat Ratio, Verum totus conatus hic meus cedat in nominis sui sanctissimi gloriam, Proximique salutem.

## HISTORIA MORBI.

**A**D ipsam rem jam progressum faciens necessarium duco præmittere historiam morbi, ut huic præcognitæ reliqua dicenda firmiori inniti queant fundamento. Estque hæc:

Post assumptas avidè carnes vervecinas vel suillas, aliudue difficilis concoctionis edulii genus, <sup>1</sup> aut etiam post quemvis laudabilem cibum singulari cum dulcedine atque aviditate præcipitanter nimis & magna in copia ingestum, <sup>2</sup> semifaturum <sup>3</sup> vel ultra satietatis limites oppletum, corripit fastidium ciborum, <sup>4</sup> (cui jungitur aliquando sensus tensivus vel gravativus

Ven-

1. D. Moller. Rayger. Reiman. 2. Moller 3. Köleséri. 4. Köleséri, Genselius.



Ventriculi <sup>5</sup>, nonnunquam anxietas præcordiorum inquietudine comitata <sup>6</sup>, Ructus <sup>7</sup>, conatus vomendi <sup>8</sup>, interdum ipse Vomitus <sup>9</sup>, inflatio abdominis flatulenta, torminosa <sup>10</sup>, diarrhæa, <sup>11</sup>;) Mox languor atque lassitudo quædam membrorum <sup>12</sup> sensim sensimque incrementa sumens, ut tandem gravativo contusorium profundum dolorem exhibeat <sup>13</sup>, cum sensu gravativo, in nonnullis tractorio & tensivo dorso inter scapulas <sup>14</sup>, (qui nonnunquam versus manus successivè sese extendendo oneris cujusdam veluti ad extrema manuum delabentis sensum infert <sup>15</sup>) & dolor capitis gravativus <sup>16</sup>. Hinc oriuntur pandiculationes, torpor sensuum <sup>17</sup> & cogitationum <sup>18</sup>, displicentia sui <sup>19</sup>, in aliquibus propensio in somnum fere ineluctabilis <sup>20</sup>, inappetentia <sup>21</sup>: succedunt paulo post horripilationes modo majores, modo leviores <sup>22</sup>, apud aliquos cum æstu volatico initio atternantes <sup>23</sup>, jam calor major vel minor <sup>24</sup> cum augmento doloris capitis <sup>25</sup>, (quo durante calore circa tempora pulsatorius, ardens, nonnunquam lancinans, vibrativus observatur dolor <sup>26</sup>) noctes inquietæ <sup>27</sup>, insomnia turbulenta, alvus adstricta, venarum solito major turgescencia, arteriarum pulsus febrilis, & tubercula dura (quæ pressa exquisitè dolent <sup>28</sup>;) per totum corpus <sup>29</sup> imprimis verò in spina dorso, collo, nucha, circa tempora, maximè circa carpos manuum externè <sup>30</sup> supra radium palpabilia <sup>31</sup>, modo majora, modo minora <sup>32</sup>, (instar pisi, seminis lini, nucum juglandium <sup>33</sup>;) pro ratione scilicet subjectorum, in iis etiam qui sæpius frictione morbum hunc profligarunt, majores observantur <sup>34</sup>. Corripit alias morbus hic sanos <sup>35</sup>, altioris æque atque infimæ fortis & utriusque sexus homines,

## B

5. Rayger. Genselius. Moller. Reiman. Bacsmegyi. 6. Bacsmegii 7. Gensel. 8. Genselius, Bacsmegyi. 9. Genselius. 10. Rayger. Mollerus. Reiman. 11. Köleséri. 12. Höferus. Köleséri. Rayger. Moller. Reiman. Bacsmegyi. 13. Conterranei. 14. Conterranei. 15. Conterranei. 16. Höferus. Rayger. Mollerus. Reiman. Bacsmegyi. 17. Köleséri. 18. Conterranei. 19. Reiman. Rayger. Moller. 20. Conterranei. 21. Köleséri. 22. Geigerus. Köleséri. Reiman. Rayger. Moller. 23. Höferus. Conterranei. 24. Köleséri. Rayger. Mollerus. Reiman. 25. Conterranei. 26. Conterranei. 27. Köleséri. 28. Köleséri. 29. Köleséri, Geigerus, Reimannus. 30. Höferus. Reiman. Moller. Rayger. 31. Ex Conterraneorum relatione & ostenso loco hoc scio. 32. Conterranei. 33. Geigerus. 34. Reimannus. 35. Mollerus.



nes <sup>36</sup>, frequentissimè famelicos, ac post prægressum jejuni-  
 um <sup>37</sup>, omni annorum tempore <sup>38</sup>: Inter temperamenta frequen-  
 tius cholericæ vel cholerico melancholicæ <sup>39</sup>, Peregrini in Hungaria  
 commorantes nunquam vel solum rarissimè hoc morbo corri-  
 piuntur <sup>40</sup>. Et respectu frequentiae etiam inter Hungaros diversi-  
 tas quædam intercedit, nam quos Comitatus Hungariæ meri  
 Hungari incolunt unicè lingua patria hungarica utentes, iis fa-  
 miliarior hic esse solet morbus, quam aliis, ubi germanica vel  
 schlaunonica simul viget <sup>41</sup>. Solvitur malum hoc totum spatio  
 unius vel alterius horæ, vomitu, inprimis ab initio sponte su-  
 perveniente <sup>42</sup>; nodis autem jam præsentibus & æstu incremen-  
 tum fumante solus vomitus non sufficit <sup>43</sup>. Solvitur etiam per  
 sudorem sponte obortum <sup>44</sup>, aliquando etiam per diarrhæam <sup>45</sup>.  
 Curatur à popularibus frictiones validas instituendo, iis præ-  
 cipuè in locis, ubi tubercula præmemorata deprehenduntur <sup>46</sup>  
 ope aceti allii, piperati <sup>47</sup>, spiritus vini <sup>48</sup> inprimis ol. aliquo  
 destillato remixti v. g. succini <sup>49</sup>, vel viribus Rad. Levistici in-  
 prægnati <sup>50</sup>, aut solâ salivâ <sup>51</sup>. Alii butyrum in hunc finem  
 eligunt <sup>52</sup>, pinguedinem alii anserinam, imò porcinam, prius  
 tamen ad ignem modicum calefactam, aut liquatam <sup>53</sup>. (Quod  
 remedium inprimis in adfuetis, sæpe totam curam absolvit,  
 præcipuè verò repetitum, & initio morbi susceptum <sup>54</sup>, inter-  
 dum minus feliciter impedit subsequendos morbos <sup>55</sup>.) Remedii  
 insuper loco ipsis est abstinencia à cibo <sup>56</sup> vel spirituosorum v.  
 g. vini generosi <sup>57</sup>, spirit. Vin. cum pipere <sup>58</sup>, aut Ess. abietis  
 assumptio <sup>59</sup>, & denique motus corporis vehementior, susceptus  
 cursu equestri vel pedestri aut velocius solum deambulando,  
 vel laboribus <sup>60</sup>. Terminatur ut plurimum unius, 2. 3. vel 4. die-  
 rum spatio <sup>61</sup>. Neglecto vero initio malò, nec adhibita fri-  
 ctione vel alia medela, excretionibus supra allegatis spontaneis  
 etiam emanantibus, ut plurimum succedunt febres intermit-  
 ten-

36. Köleséri. 37. Mollerus. 38. Genselius. 39. Mollerus. 40.  
 Mollerus. Gensel. Rayger. 41. Mollerus. 42. Mollerus. 43. Mollerus.  
 44. Mollerus. Köleséri. Reiman. 45. Köleséri. 46. Höferus. Conterranei.  
 47. Coberus. Köleséri. 48. Köleséri. 49. Köleséri. 50. Conterranei.  
 51. Rayger. Moller. 52. Conterranei. 53. Conterranei. 54. Moller. 55.  
 Genselius. Conterranei. 56. Köleséri. 57. Conterranei. 58. Conter-  
 ranei. 59. Raygerus. 60. Conterranei. 61. Köleséri. Conterranei.



tentes <sup>62</sup> vel continuæ <sup>63</sup>, ipsa quoque febris hungarica <sup>64</sup>: vel longissimo interdum tempore valetudinarium hominem relinquit <sup>65</sup> cum inappetentia, lassitudine, & alvo adstricta confluentem <sup>66</sup>. Stata recurrendi tempora minus observat, sed errores dietæ sequitur supra dictos <sup>67</sup>, hac tamen cum differentia, ut in adsuets vel levissima ex occasione eorum denuo tragœdiam suam ordiatur <sup>68</sup>. Aliis morbis non complicatur <sup>69</sup>. Nunquam contagiosus est <sup>70</sup>. Multo minus petechiis stipatur <sup>71</sup>. Nec, quod Höferus ex relatione quorundam hungarorum recenset, sc. initio neglectum, spretâ frictione, hominem intra triduum neci dare, experientiam adstipulantem habet <sup>72</sup>.

62. Reiman. Gensel. 63. Gensel. Moller. Reiman. 64. Köleséri. 65. Köleséri. 66. Köleséri. Rayger. 67. Moller. 68. Reiman. 69. Genselius. 70. Moller. Rayger. Genselius. 71. Moller. Reiman. Contreranci. 72. Raygerus.

## T R A C T A T I O.

**E**Xpositâ Historia Morbi lubet de nomine ejus quædam prælibare: Hungaris itaque trium nationum, videlicet, Germanis, Schlavis & stricte sumptis Hungaris communi nomine venit Tsömör. Nec in Transylvania Hungaros, Saxones & Valachos inter diversum sortitur nomen teste *D. D. Köleséri*, de cujus vocis origine tametsi certi quid determinari vix possit, si tamen conjecturæ locus, existimarem ab Hungarica voce Tsomo, quæ nodum significat ortum suum duxisse, vnde primitus forte Tsomos-ér, id est, Nodosum vas, vel simpliciter Tsomos, id est, Nodosus, (sc. morbus,) à tuberculis instar nodorum hoc in morbo palpabilibus, appellatus sit, successu verò temporis per abusum o in ö, & ultimum s. in r. mutatum, ut nunc Tsömör audiat, licet aliqui etiam loco ö, simplex e. & loco Ts. Cs. adeoque Tsemer vel Csemer scribant: Et cum vox Tsömör commune nunc nomen sit omni nausæ apud Hungaros, forte à nausea cum hoc morbo subinde concursante, transumpta demum sit appellatio ad simplicem quoque vel cum aliis morbis complicatam nauseam.



Latinum nomen diversos apud scriptores diversum legitur: *Coberus* quippe & *D. Vindisch* eum Languoris Pannonici & Hungarici titulo insigniunt, licet illi alibi quoque sub Morbi Hungarici, Luis Pannonicæ titulo ueniat. *Wolfgangus Höferus* l. c. & *D. Joh. Paterfon Hain* pariter supra alleg loco, Hungaris Nauseam eum dici exponunt. *D. D. Köleséri* denique loco nausæ Scorbuti mediterranei nomen magis arrisit. Quodnam autem nunc dictorum nominum latinorum morbo huic convenientius esse videatur, tametsi paulo scrupulosius de eo disquirere, supervacaneum ipsemet censeam, quod in verbis faciles nos esse conveniat, dummodo rem eandem, diverso licet sub nomine complectamur; nihilominus, cum nomina sæpe nos manuducant ad ipsarum rerum cognitionem, & ipsam naturam rei exprimant, non omni ex parte inutile fore spero paucis de eo disquirere.

Ad Languoris itaque nomen quod attinet, *Coberus* quidem nullibi, quod sciam, denominationis suæ rationem disertè exprimit, nisi forte ex eo peteret, quod dicat ipsum Languorem esse per se, & non morbum *D. I. obs. VI. in scholio*, unde etiam ibidem eum definit per dispositionem ad morbum. *D. Vindisch* verò, tametsi contra *Coberum* fateatur affectum hunc esse morbum, nihilominus quod cuncta corporis humani membra vehementem in languorem conjiciendo, in eo præprimis malitiam suam exserere ipsum scribat, languoris nomen ei competere dicit: Verum enim vero priori denominationis rationi obstat, quod utique in hoc affectu variarum partium functiones more solito & statui naturali conformi non exerceantur, ex quarum tamen mutato habitu rectè ad statum præternaturalem & præsentiam morbi concluditur. Vel si forte eam ob causam dubitasset hunc affectum inter morbos referre, quod quandoque præcedere soleat febrim strictè dictam hungaricam (quamvis *D. Vindisch* neget ullum morbum eum insequi, cui fundamento innixus, nescio, nam nec suam tum temporis experientiam interponere, nec ad aliorum Hungarorum consensum ante quæstionem motam prouocare potuit) adeoque Languor hic dispositionem quandam ad illum involvat, & præcursorem illius agat, eo ipso quidem agnovisset diversum esse.



esse hunc affectum, & sæpe tempore priorem illo, perperam tamen conclusisset, ipsum eo ex capite à morborum censu debere excludi, nisi hæmoptisim phtyisim nonnunquam pedissequam habentem, & alios consimiles affectus pari ratione a morborum classe arcere velimus. Ad *D. Vindisch* verò rationem (ut malitiam, quam huic tribuit, mittam) sufficiet reponere. 1. Non semper languorem huic morbo familiarem molestissimum reliquorum esse symptoma, quod ex Nausea, cardialgia & anxietate præcordiorum cum hoc morbo concursante evidens esse potest. Nec 2. à molesto aliquo symptomate justam semper denominationem simplicis cujusdam morbi desumi, cum enim simplex morbus quicumque solennia essentialia quædam juncta habeat symptomata, ex quorum Syndrome & nexu de certi alicujus morbi præsentia & nomine informamur, & non nisi in complicatis morbis, ubi pluribus affectibus familiaria phœnomena simul obversantur, ab eo, quod majorem læsionem ostendere videtur, vel magis urget, denominationem sumamus, nescio, cur in tam simplici, & ut mihi videtur, veteribus noto morbo ad aliud nomen confugere debeamus. Nauseam quod concernit, tametsi facilè subscribam *D. D. Köleséri*, eo nomine non semper compelliari posse hunc morbum, quod conatus vomendi non semper adsint, reliqua verò symptomata huic morbo propria simplici Nauseæ minime adscribi queant, confido tamen Virum cæteroquin Eruditum (prout ex scriptis ejus comparet) id ipsum non indignè laturum, si ratione Scorbuti nominis diversum ab eo sentiam, partim quod Scorbutus propriè dictus, admodum rarus sit Hungaris morbus, teste *Raygero seniore in notis ad Spindleri observationes p. m. 160.* cujus verba hæc sunt: *Apud nos scorbutus valde rarus est, inprimis in indigenis & Patriæ filiis, apparent quidem quandoque symptomata scorbutica, ut maculæ in cruribus, gingipedium, sed ab alia causa proveniunt, & aliter curari desiderant, propterea nec antiscorbutica apud nos magnum merentur applausum, aut eam præstant efficaciam, qualem in vero scorbuto, inque illis locis, ubi grassatur, præstare solent:* cui ratione infrequentia hujus morbi *D. D. Moller* quoque & *D. Raygerus junior* suffragantur in *Respons. suis*; partim verò, quod complura symptomata scorbutum stipari solita mi-



nimè deprehendantur in hoc morbo, diversamque scorbutus indolem foveat, exempli loco esto gingivarum laxitas, cruentatio & sensim quasi in tabum resolutio, ulcera livida mali moris, maculae scorbuticae, ossium corruptiones, pruritus in externis partibus, dolores variarum corporis partium, non gravativi solum & tensorii, sed pungitivi, rodentes, ut plurimum vagi, lypothymiae, paralyfes, convulsiones, deliria & alia, &c. de quibus *Severin. Evgalenus libr. de scorbuto, & Celeb. Stablius in Diff. sua de scorbuti & Luis venereae differentia* conferri possunt: Scorbutus insuper contagiosus sit, morbus Tsömör minime. Nausea verò, vomitus, languor & tumores tametsi similitudinem quandam ostendere videantur, diversitatem utique non levem involvunt; Cum Nausea, Vomitus scorbuticus ex improvviso saepe oriantur, nulla praecedente causa simili occasionali ut in morbo Tsömör, nec tam salutarem effectum post se trahant, comparem illi, qui ab his excretionibus tempestivè procedentibus in hoc morbo provenit. Languor verò apud nonnullos scorbuticos tantus est teste *Eugaleno*, ut ad lypothymias proclives sint ægri, si in rectum statum sese erigere velint, cum quo tamen Hungari in hoc morbo non solum citra Lipothymiae metum erecto corpore pedibus inniti, sed & progredi queunt. Tumores denique illorum oculis etiam usurpari possunt, qui in morbo Tsömör non nisi tactu deprehensibiles sunt teste *Geigero, Reimanno*.

Si jam quæ mea animi sensa de hoc morbo, exponere fas sit, ex Historia morbi colligo, morbum Tsemmer, modo simplicem esse Nauseam, modo Febrim Stomachicam Ephemeræ veterum ex cruditate & repletionem ortæ analogam, adeoque *Motus extraordinarios à Natura provida* (Animam intelligo humanam, immaterialem, vitaliter agentem, & pro diversitate necessitatum atque periculorum corpori humano imminentium diversimodè, proportionatè tamen ut plurimum organa corpora impellentem,) *provocatos ad vitia primæ concoctionis* (ex qualitate ciborum prava, vel quantitate laudabilium licet esculentorum nimia & præcipiti deglutitione cum insufficiente eorum masticatione oriunda) *per copiosiores humorum ad organa chylicationi velificantia affusionem vel corrigenda, vel ad expeditiorem motum facilitando*



*do tandem per superiora vel inferiora ex corpore eliminanda, aut si cum ipso jam sanguine mora temporis communicata fuerint, celeriori per porosas peripheriæ corporis partes transpressione attenuanda.*

Dico esse interdum simplicem Nauseam, videlicet, dum non solum conatus vomendi, actu, languori membrorum & dolori capitis gravativo in hoc affectu jungitur, sed si insuper huic vomituritioni vomitus superveniens vel diarrhæa totum malum solvit, ut reliqua hunc morbum comitari solita phœnomena pœnitus emancant, adeoque nullius febris complicatæ vel nauseam excipientis suspicio relinquatur.

Febris verò nonnunquam concursus auguror ex circumstantiis communi Medicorum ore feбри adscriptis v. g. horrore, calore, nunc pauciores, nunc plures horas durantibus, pulsū denique arteriarum febrili, cum reliquis febrilis motus consuetudinibus. Stomachicam verò appello febrem ex subjecto materiæ morbificæ primario, immitatus eos, quibus febres infantum ex lacte corrupto, vel vermibus in ventriculo nidulantibus, aut denique cruditate ciborum, occasione adiphagiæ, subnatâ oriundæ stomachicarum sub nomine veniunt: Esse autem Ventriculū primariam sedem materiæ morbificæ vel ex eo patere potest, quod exonerata tempestivè Vomitu saburrâ in ventriculo contentâ totum malum paucarum horarum intervallo dispareat, successive tamen quandoque in massam sangu. quoque derivari labem, inde suspicor, quod ortis tuberculis, & æstu incrementum sumente soli vomitui non amplius cedat morbus hic, sicut nec tali in casu purgans propinatum totum malum tollit teste *D. D. Mollero*. Dixi insuper febrem hanc esse Ephemeram Veterum ex cruditate ortæ affinem; Ephemeram enim eam esse terminus ejus intra 1. 2. tresve dies evincit, quem si transcendat, vel in continuam febrem, vel intermittentem desinit, an etiam instar aliarum diariarum in hecticam vel lentam febrem nonnunquam mutetur, ex languore equidem diuturno, inappetentia cum alvo adstricta eandem aliquando excipiente suspicor, destitutus tamen plurium phœnomenorum febris lentæ indicia manifestiora exhibentium testimonio confidenter asserere dubito. Affinitatem vero hujus cum Veterum Ephemerâ ex cruditate ortum ducente (de qua *Galen. 8. Method. Medend. c. 5.*

*Ætius*



*Ætius tetra bibl. 2. serm. 1. c. 68. Alexander Trallianus l. 12. c. 1. Avicenna Canon. Medic. Lib. IV. Sect. 1. tr. 1. c. 26. & Sennert. de febr. l. 1. c. 6. agunt*) innuere videntur tum causarum prægressarum ex ciborum qualitate vitata, vel quantitate nimia conformitas: tum symptomatum v. g. ructus, distensio ventriculi, conatus vomendi, alvus modo soluta, modo adstricta, languor corporis & dolor capitis præter febrilia phænomena, *Vid. Sennert. c. l. paritas*, (nisi forte tubercula hoc in morbo palpabilia quisquam illi veterum ephemeræ minimè competere dicat, quæ tamen, cum ex mea sententia tendinum initia sint, à veteribus forte neglecta sunt tam studiosè annotari, ut pote nîl vel parum momenti ad morborum accuratiorem notitiam præbentia) curandi denique ratio eadem; commendabant enim vel vomitoria, vel alvum subducentia, aut stomachica duntaxat, pro conditione scilicet materiæ morbificæ; Avicenna vero insuper inedia suadet, & dicit huic feбри præcipuè biliosa corpora esse obnoxia, conformiter morbo Tsömör, qui etiam cholerici vel cholerico melancholicis familiarior est.

Dum verò uterque hic morbus definiendus mihi veniat, nullum aptius genus, utriusque morbi indoli conveniens, deprehendi, quam Motus extraordinarios, esse enim in utroque morbo motus, & quidem alios, quam pro ordinario naturæ cursu, neminem credo inficias iturum, qui symptomata eorum perpenderit, quapropter prolixiore etiam probatione hujus supersedeo; id tamen non undiquaque omnibus expeditum videbitur, quod Motus hosce Naturæ, sive Animæ immateriali tribuam, cujus tamen probatio cum non uni, sed pluribus momentis innitatur, ad ipsorum symptomatum enodationem, ceu oportunior locum, ne crambem recoquere cogar, eandem reservabo, ubi si quantum per brevitatem fieri licuerit ostendero, à materialibus causis phænomena morbi proficisci non posse, eo ipso documentum erit ab Anima ceu altera hominis parte eadem peti debere, dum tertia pars hominis, quæ ab aliquibus in subsidium vocari solet, magis luci veritatisque fuerit asserta.

Dixi vero vitia concoctionis primæ ex qualitate ciborum prava, vel laudabilium licet esculentorum quantitate nimia & insufficiente



ente eorum masticatione oriunda causam esse, cur Natura motus hosce extraordinarios suscipiat: Constat enim ex historia morbi morbum hunc non nisi errores dietæ sectari, & contra tempestivè oborto vomitu vel alvi fluxu præsentem mitescere, evidenti argumento errata dietæ, quatenus digestionem promptam eludunt, constituere debere non solum occasionalem, sed simul continentem causam hujus morbi: turbari verò digestionis negotium ab erratis iis in Historia morbi allegatis, paucis impræsentiarum probandum erit, 1. itaque Qualitatis ratione, suppono cœu notum à posteriori, cibos æquali quantitate assumptos, alios facilioris esse digestionis, alios magis refractarios sese gerere, ex horum verò censu pingua quoque esse, quæ sive oleosa sua ramositate, salinas menstrui particulas obtundendo & in motu præpediendo, aquosas verò ab intimiore sui ingressu arcendo, sive denique tonum ventriculi aliqua ex parte relaxando agant, frustrari sæpe deprehenduntur concoctionem, jam, cum caro vervecina & suilla comuniter copiosa pinguedine luxuriare soleant, evidens esse arbitror, cur eadem quoque præ aliis cibis difficilius admittant concoctionem, idque tanto magis, quo avidius ingestæ fuerint, uti enim lænocinium gustus vel fames prægressa hujusmodi aviditatis sæpenumero aucthores, rarò longiorem masticationi concedunt moram, ita non probe præmansas carnes has tanto difficilius etiam in ventriculo resolutionem subire debere ex mox dicendis constabit. Quantitatem vero nimiam 2. ciborum etiam alias facilè concoctioni auscultantium, ingens momentum habere ad frustrandam concoctionem, præter veritatem à posteriori, à priori quoque confirmari videtur ex eo, quod in omni resolutione mixtorum, certa proportio intercedere debeat, menstruum inter, & corpora resolvenda, non solum ratione qualitatis, sed & quantitatis, unde & in resolutione ciborum, quocunque tandem nomine eandem exprimere placeat, idem obtinere debere, probabile est, tollitur autem proportio hæc quantitatis, menstruum inter ventriculi & cibos resolvendos in ingluvie & adiphagia, quare & digestionem labefactari necesse esse sana docet ratio. Masticatio verò 3. uti ritè & sufficienter instituta duriores ciborum partes discerpendo, comminuendo, salivalemque humorem



rem intimius cum aëre iis immiscendo non uno nomine resolutioni ciborum favet, ita insufficientem, brevem, minus præparatos, & magis refractarios concoctioni tradere cibos eodem ex fundamento verosimile est. Monendum hic duco *Coberum* non solum à cibis, sed & aquis insalubribus *D. I. obs. VII.* A vini immoderato usu *D. I. obs. VIII.* Ex ira *D. I. obs. IX.* Ab Aëre Hungarico *D. I. obs. X.* & à vigiliis *D. II. obs. I.* languorem suum hungaricum deducere: Tametsi verò in dubium vocare nolim, causas hasce inducere potuisse languorem, pendeo tamen animo, an non sub languore ejus has causas excipiente febris vulgo dicta hungarica, quam sæpe cum morbo *Csömör* confundit, vel alia febris ephemeræ species latuerit, cum notum sit languorem tam Febrim Hungaricam, quam Ephemeram comitari, & non rarò Ephemeram ab ira, spirituosius potulentis, feruore aëris nimio, vel transpiratione impedita (quæ si ullibi, sane in Hungaria familiaris, imò quotidiana est, cum æstate fervidissimum licet diei tempus præcesserit, sub noctem tamen frigidior aëris sit constitutio,) vigiliis denique natales suos ducere; aut si utiquè morbus *Csömör* fuerit, dubium an non ciborum quoque concursus accesserit, cum in castris vix non quotidie circa hos delinquatur, quo sensu etiam *Höferi in Herc. Med.* & *D. Paterson Hain in Misc. N. C. loc. cit.* accipienda esse arbitror verba, dum uterque præter cibos à potu quoque morbum hunc ortum sumere scribit. Cur autem à supra memoratis Coberi causis & potu non proficisci hunc morbum credam, inducor ex eo, quod nec *D. Raygerus*, *Mollerus*, *Genselius*, *Reimannus*, *Bacsmegyi* mentionem harum causarum ullam faciant, nec me unquam in Hungaria eas ob causas quenquam morbum hunc incurrisse recorder, nec ab aliis conterraneis certi quid ea de re expiscari potuerim.

Dixi præterea in definitione data, scopos naturæ præfixos esse in Motibus hisce extraordinariis adornandis, ut directione sanguinis copiosius versus interiora augeat secretionem humorum chylicationi inservientium, ad vitia illa concoctionis vel corrigenda, vel solum ad expeditiorem motum prædisponenda, quò subsequis tandem motibus excretoriis sive per superiora, sive inferiora tanto promptius obsequantur, & sic feliciter è corpore



pore eliminantur: Esse enim hic peculiarem talem directionem humorum ab externis ad interna sensus tensivus & gravativus artuum, non minus horror testantur, de quibus inferius: augeri verò secretionem à copiosiori humorum collectione circa internas partes vel inde elucescere potest, quod copiosiori sanguine distenta magis vasorum, inprimis arteriarum latera, utique patentiores quoque reddant poros & orificia vasorum lateralium in organis secretoriis, per quæ magis hiantia copiosiorrem quoque fieri debere secretionem, sanæ rationi obvium est. Eo ipso autem dum ob majorem secretionem humorum salivalium, ex ventriculi itidem glandulis & denique pancreate & hepate major fit affusio humorum menstrualium, facile quoque intellectu est, coeptam antehac digestionem sub hisce circumstantiis absolvi, adeoque vitia concoctionis corrigi debere, aut si cruditates hæ adeo difficiles concoctu sint, ut non nisi longiore mora demum superari & emendari queant, diuturniori verò hujusmodi correctioni Natura insudare nolit, palam est, ad minimum abstergendis quasi iis & lubricandis, vehiculi denique loco commodam locare operam hanc copiosiorrem humorum affusionem. Præter hos verò humorum directorios, alios quoque excretorios nonnunquam ciere motus Naturam ad vitia primarum viarum sive per superiora, sive inferiora proturbanda & ex corpore proscribenda, vomitus & diarrhæa testantur, quibus initio ritè succedentibus brevi victas dare manus morbus assolet. In sanguinem autem mora temporis indigestus chylus delatus, ne cum aliis sanguinis moleculis per subtilissimos capillarium vasorum mæandros pressus obstructionibus hinc inde facile ansam præbeat, huic quoque occurrere providam Naturam dixi, transpressione fortiore, celeriori, & frequentiori sanguinis per porosas peripheriæ partes, uti enim sub æstu febrili fortius & celerius circulari sanguinem per habitum externum corporis vix quisquam amplius hoc tempore inficias ibit, ita hoc eodem motu fortiori attenuari sanguinem, & cum eo indigestas quoque chyli moleculas discerpi & subtilisari debere, necessarium consequens est.

Haftenus de Nomine & Definitione, jam ad ipsorum phænomenorum in hoc morbo obviatorum enodationem transitum facio. Prægressa itaque *ciborum* vitia, excipere solet *fastidium* eorum, quod



in plerisque tantum est, ut non solum sine peculiari difficultate & renitentia eisdem deglutire, sed ut conterraneorum quidam suo ipsius exemplo mihi fidem fecit, ne odorem quidem perferre, imò nec oculis sine singulari quadam animi averfatione contemplari possint, idque non modo durante morbo, sed morbo etiam jam profligato, imò aliquando per quadrantem anni & amplius post superatum morbum: fastidium hocce animæ adscribendum esse, uti à plerisque omnibus assensum mihi polliceor, perpendentibus fastidium & averfationem, involvere voluntatem aliquam quasi negativam, quam corpori tribuere à sanatione alienum esset, ita tamen nova moveri posset quæstio, utrum anima hic se se active habeat, vel passive, id est, an non ob ventriculi fibrillas nerveas à materia morbifica sive pondere, sive alia quacunque ratione mechanica irritatas, vellicatas, verbo, certo modo affectas in fastidium trahatur, prout ab objectis externis organa sensoria afficientibus in sensum & perceptionem ciatur? Ego priori suffragor, hisce ut alias mittam, inductus rationibus, quod cum fastidio ciborum non semper sensum aliquem gravativum, vel quemcunque alium ventriculi concurrere observent ægri, & quod palmarium, exonerato licet ventriculo à contentis suis, nec vestigiis ullis morbi amplius relictis, tamen in longum tempus protrahatur fastidium, manifesto indicio non à materia morbifica passivè in hanc averfationem compelli naturam; sed potius activè cibos eos averfari, à quibus novos sibi parari labores metuit, idque tam diu, donec sensim sensimque excusso vanido metu eos denuo appetat, eadem sc. ratione, qua complures cerevisiam vel quæcunque alia vehiculi loco cum purgantibus data in longum tempus fastidiunt.

*Sensum Ventriculi tensivum & gravativum*, non à sola copia ingestorum deduco, cum etiam semisaturis, adeoque necdum tanta mole infarctis, quæ ventriculi latera & distendat nimium & gravet, obtingat: nec à præcipiti ciborum deglutitione eum evenire suspicor, quod longè etiam à pastu adeoque sensu insolito ab impetu deglutitionis profecto jam pridem cessante tamen observetur, supponunt nempe nonnulli ventriculum, qui brevi post pastum distentus est, cum successiva chymi ad intestina propulsione arctari, quod utique ex dissectione cadaverum longè



gè vel brevi post pastum demortuorum, non minus vivisectionibus animalium diverso tempore susceptis, palam est; ex quo inferunt, si in contractum ventriculum cibi solito impetuosius intrudantur, ob insolitam vim, renitentiam majorem ventriculi oriri adversus ingesta, unde tensio & gravitas, hos tamen premit jam allegata ratio, ut aliam mittam, qua sequi deberet ad primi mox boli præcipitem deglutitionem hunc sensum oriri, qui tamen non nisi jam semisaturis evenit: quibus persuadeor, ut potius ob æstimationem noxiæ, vel molestæ materiæ præsentaneam concoctionem frustrantis, à Natura renitentiam hanc ventriculi cieri credam, à qua demum sensus ille ortum sumat.

Ab eadem activa ventriculi renitentia, vel ut magis perspicuè exprimam, motu tonico ventriculi à Natura aucto dependere dico & *Anxietatem præcordiorum inquietudine comitatam*, & *conatus vomendi & ipsum vomitum*, sive copia ingestorum & expansiva eorum inflatio simul concurrat, sive minus, & parva ingestorum quantitas præsto sit: Natura enim videns sibi objici novas difficultates circa concoctionem, breviori viâ, sc. per Vomitum sese oneribus hisce expedire mavult, quam longiori mora concoctioni eorum difficili studere, præprimis cum damnum ab ejectione assumptorum metuendum facile reparabile sit per magis conducibilia fercula, hinc in iis subjectis, qui ad vomitum faciles, aucto superiora versus, contrario naturali, motu constrictorio ventriculi, in consensum etiam diaphragmatis motum descensorium associando, superius verò orificium ventriculi relaxando, non solum conatus vomendi, sed si materia mobilis sit, vomitus quoque feliciter ciet: In aliis verò, quorum vel in genere indoles segnior, negligentior, vel solum ad Vomitum minus proclivis, aut omnes hujusmodi renitentes motus omittit, solo fastidio & averfatione ciborum, à quibus vitia cumulari metuit concoctionis, contenta; aut languidos duntaxat motus instituit, sensum gravativum, tensivum exhibentes: *Anxietates verò præcordiorum in specie*, si ingestorum copia & inflatio concurrat, dico partim à distentis, per contenta, ventriculi fibris, partim harum erga materiam renisu dependere, unde auctus dolor anxios & inquietos reddit ægros; à sola enim distensione ventriculi per materiam in eo-



dem contentam non oriri inde suspicor, quod sæpe nimium quantum etiam tumefacto stomacho, minus tamen anxius sentiatur dolor: si autem pauca sit materia præsens, & tamen ab his causis eveniat anxietas præcordiorum, fieri id dico à constrictis undiquaque fortius ventriculi lateribus, & materiæ ventriculo inclusæ (inprimis necdum probè dissolutæ) quali renisu, quo mutuo fortiori affricu auctus dolor, pari ratione molestiam ægro, & hinc inquietudinem infert: non proficisci verò motus hosce vomibundos & cardialgicos à materia morbifica physico quodam causandi modo, sc. vel copia sua gravando, aut acrimoniâ rodendo, stimulando ventriculi latera, inde evidens esse puto, quod hæc etiam citra insignem ingestorum copiam eveniant, suspicionem verò stimuli amoveant assumpta sæpe nîl minus, quam vel acrimonia prædita, vel ullius alterius efficaciam, quæ contractionem ventriculi physica quadam ratione inducere posset: testis est caro vervecina, suilla, placentæ cum butyro frixæ, panis recens tepidus butyro inunctus, à quo postremo, conterraneus hujas præsentissimè morbum Csömör sese incurrere mihi asleverabat, nisi forte rancidam acrimoniam hic quisquam incusare vellet, cui tamen difficile probatu esset tam brevi temporis mora v. g. butyrum, lardum recens &c. in rancorem abire. Ut adeo sanæ rationi magis consentaneum esse videatur, Naturam motus hosce activè suscipere, non stimulo aliquo molesto impulsam, sed propter æstimationem materiæ noxiæ vel molestæ concoctioni, à qua proinde motibus hisce sese liberare satagat.

*Ructus* nîl aliud sunt, quam flatuum ex resolutione ciborum in ventriculo insufficiente prognatorum, per constricta ventriculi latera, relaxato orificio ejusdem superiori, expulsio. Pari ratione *Inflatio abdominis torminosa* flatibus originem debet, qui distendendo intestina abdomen in majorem molem elevant, simul verò dum contranitentibus sive constrictis intestinorum fibris ab uno intestini loco in alium propelluntur (inprimis si à fermentescente acri quadam materia producti sint) torminosi passionibus viam sternunt.

Cum nunc memoratis symptomatibus primarum viarum, vel etiam sine his & solo cum fastidio ciborum complicatus *Lan-*

*guor*



*guor atque lassitudo membrorum*, uti in potentiam quandam, five minores in movendis artubus vires involvit, ita spontaneam hic potius remissionem virium Naturæ circa movendos musculos, subesse, quam actualem quandam impotentiam, realem virium defectum supponentem credo, quod videlicet, alii minus tenera animi indole præditi, obfirmato quasi animo motus corporis vehementiores v. g. cursu, laboribus &c. suscipiendo, membrorum hunc languorem eludant, qui si actuali virium defectui ortum deberet, tantum abest, ut moribus his fortioribus superari posset, ut potius magis magisque vires prosterni deberent; remittere verò Naturam ab intensione suarum virium circa motus voluntarios eum ob finem probabile est, ne videlicet vires suas, nunc circa actiones vitales magis necessarias in externis prodigat.

*Sensum gravativum artuum & tractorium dorsi, ut & sensum oneris cujusdam delabentis ad extrema manuum*, derivò à musculorum in artubus & dorso strictura tonica successivè magis aucta, ob quam cum sanguis per arterias advectus tanta copia in porosas musculorum partes non admittitur, à tergo verò pulsu urgente sanguis pro ingressu suo facilitando adversus strictas ita porosas partes nititur, ex hoc sanguinis nisu, & fibrarum muscularium reactione, atque repressione sanguinis, nascitur sensus gravativus, ut & tractorius, qui, si à scapulis & dorso initium fiat stricturæ hujus tonicæ auctioris, & versus extrema manuum successivè desinat, æmulatur delabentis cujusdam oneris versus extremitatem manuum sensum: Concurrere verò cum sensu gravativo artuum stricturam tonicam auctiorem, tum manifestus pallor ita correptorum, secundum conterranei confessionem, tum ipse sensus dorsi & scapularum tractorius evincit; quæri tamen meritò hic posset, utrum strictura hæc consensualis sit cum stomacho, intermediis nervis, vel citra ullam spasmum ex ventriculo, cum fibris nerveis artuum communicationem accadat, & si hoc, an revera materia quædam stimulando, vel quoquomodo afficiendo fibras musculares artuum, causa hujus motus tonici aucti sit, vel citra ullam proportionatæ materiæ suspicionem eveniat? Ex ventriculo sane consensualiter per nervos stricturam hanc non proficisci, testatur id, quod nul-

lis



lis etiam molestiis circa ventriculum affectis, (nisi quis forte fastidium ciborum eo annumerare vellet, de quo tamen supra) eveniat: materiæ verò artus stimulantis absentiam id arguere mihi videtur, quod materia hæc vel ante commissos dietæ errores in sanguine jam præexistisse hoc pacto admittenda sit, vel quod ex ventriculi demum cruditatibus in sanguinem derivatis, cum eo ad musculos deferatur; prius refellit strictura harum partium, non nisi errores dietæ sectans; posterius partim materiæ ventriculo inclusæ conditio sæpe stimulationi inepta, partim stricturæ hujus in artubus præsentia, antequam cruditates ventriculi cum sanguine comunicatas esse probabile sit, nam primo mox morbi cum ingressu sensus tensorius, tractorius, gravativus sese exerit, quo tempore cruditates ventriculi jam in sanguinem delatas esse, illud disvadet, credam, quod vomitu initio sponte superveniente vel arte provocato brevi tota symptomatum cohors evanescat, quæ si sanguini illata labe jam fuisset, tam præsepter minimè excretionem hæc dissipari posset, ut adeo veritati proximius esse videatur, stricturam hanc sponte naturæ institui, ut non admissa in ambitu corporis ordinaria quantitate sanguinis, tanto copiosius circa interna viscera cumuletur, pro facilitanda secretionem humorum in internis partibus, de qua superius.

Confirmat hanc circa internas partes sanguinis regurgitationem *dolor capitis gravativus*, cum gravitate artuum concursans, non admissio enim per peripheriam corporis sufficiente sanguine, internè cumulus distendit solito magis vasa sanguifera, uti alibi, ita etiam in capite, à qua distensione, molesta ponderis quasi cujusdam oritur sensatio, unde & dolorem hunc magis profundè, & internè sentiri Conterraneus mihi asseveravit.

*Pandiculationes, & oscitationes*, voluntarios judico esse motus, susceptos ab ægris, ad declinandum sensum gravativum corporis, à cujus molestia, ut & obtusos reliquos sensus & cogitationes *displacientiam* quoque *animi* derivo.

*Torpor sensuum & cogitationum, propensio in somnum* sunt me judice remissiones spontaneæ activitatis Naturæ circa sensuum & rationis exercitium, ne videlicet distrahat vires suas pluribus objectis & actionibus, nunc præcipuè circa concoctionem primam



impendendas, velut in sano quoque statu post cibum, inprimis paulo largiorem (nisi contraria consuetudo intercesserit) observamus proclivitatem in nobis, majorem modo, modo minorem, ad somnum capeflendum, rationisve & sensuum exercitio tantisper vacandi, quem torporem & in somnum propensionem brevi post pastum nonnulli equidem derivant à chylo sanguini infuso, qui sanguini junctus hujus molem augeat, adeoque vasa corticalia cerebri magis distendendo fibrillas medullares comprimant, ut hinc spiritus animales minus debite influere possint in eas, premit tamen hanc hypothesein illa difficultas, quod 2. vel 3. horis post pastum, dum copiosiore jam chylo sanguis turget, hæc proclivitas ad somnum minus urgeat, quod tamen ex hac sententia necessario fluere deberet.

*Inappetentia*, uti pariter voluntatis quendam dissensum circa assumendos cibos indigitat, ita Naturæ eam merito in accepto fero, quæ ultro ob jam præsentia vitia circa digestionem, novorum ciborum appetitum negligit, ne videlicet, horum usu concoctionis negotium tanto magis gravet, & intempestivè interturbet.

*Horror* motus tonici in peripheria corporis augmentum supponit, *vid. Cel. Stablii Diff. de motu tonico vitali*, quò contractis porosissimis partibus sanguinis transitus intercluditur, & hinc cum succussatione corporis, frigoris quidam incurfantis sensus inducitur. *Calor* verò ab eodem motu tonico in peripheria corporis relaxato provenit, ob quem admissus copiosus in porosissimas peripheriæ partes sanguis suo transitu caloris sensationem fibrillis nerveis inprimit, idque tanto magis, quò *aucta simul pulsus energia & celeritate cum frequentia*, majori vi per easdem transmittitur, qui tandem *Venis* copiosior exceptus eas *magis turgere facit*. Hæc nunc dicta febrilia symptomata, videlicet, frigidum horrorem, calorem, pulsum febrilem, si quis ab indigestis chyli moleculis sanguini infusis accersere velit, quæ in extremis capillaribus arteriis peripheriæ corporis ob crassitiem hærendo, liberum sanguinis transitum in venas impedian, & ob retardatum sic motum frigoris & horripilationis sensum inferant, iis verò tandem pluribus à tergo prementibus cordis impulsibus resolutis, ob liberiores in venas transitum & per eas

D

pro-



progressum caloris ortui ansam præbeant, per me quidem licebit, ut suo abundet sensu, obstant tamen varia, quo minus huic sententiæ subscribere possim, ut alia mittam, dico solum, ex hac hypothese concipiendam esse obstructionem, si non omnium, tamen plurimorum capillarium vasorum in extremo habitu (ob frigoris sensationem universalem,) quâ durante observari necesse esset non solum tubercula plurima in superficie cutis, inflammatoria quasi, sed cum ob obstructas sic extremitates vasorum, in vicinis eorum productionibus sanguis cumularetur à novâ semper expressione sanguinis sub cordis systole, adeoque vasa magis dilatarentur, pulsus etiam ob arterias magis distensas v.g. in carpo manuum, magnus deprehendi deberet, quorum tamen nihil sub frigore observatur, & cum circa extremitates obstructas magisque sanguine repletas sub systole cordis major oriatur particularum sanguinis attritus erga vasa, major quoque ex eadem hypothese calor illic oriri deberet, non frigus; hac autem de frigore præfiguratione cadente, etiam reliqua de calore lubrico innitentur fundamento; Vel si cui ad acrimoniam chyli particularum confugere volupe esset, à qua phœnomena hæc derivanda censeret, is mox inpingeret in materiæ morbificæ conditionem, quæ sæpe ab acrimonia proportionatâ fovenda aliena est; Ut adeo verosimilius mihi videatur sub horrore, sponte naturæ, sine stimulo aliquo, aut obstructione, motum tonicum in peripheria corporis augeri pro excludendo sic sanguine ab externis partibus, & contra magis cumulando in internis ad augendas secretiones abstergendis vitiis primarum viarum inservientes; sub calore verò remitti eundem tonum, ut chylosæ indigestæ particulæ in habitu externo attenuentur, prout supra jam monitum fuit.

*Incrementum doloris capitis sub calore, & mutatio gravativi in ardentem, pulsatorium, nonnunquam vibrativum, lancinatorium, consecrarium est distensionis majoris vasorum sanguiferorum, & porosarum partium in capite, admissio quippe in externas capitis partes copiosiori sanguine propter relaxatum motum tonicum, non solum partes continentes magis distenduntur, sed & aucto cordis motu fortius impulsus sanguis, majorem caloris sensum imprimit, unde dolor ardens, cumque vasa arteriosa sub*  
hisce



hisce conditionibus magis solito distenta singulis momentis pulsus novum impetum per sanguinem à corde recipiant, nil mirum *pulsatorium* sentiri dolorem; *vibrativum* verò & *lancinatorium* subinde intercurfantem evenire suspicor, si singulares vel pauciores tantum fibrillæ huic à sanguine distensionem spasticâ quasi momentaneâ tensione reluctantur & renituntur, ob quarum tensionem, & sanguinis fortiolem impulsus hic molestissimus dolor provocatur.

*Noctes inquietæ* sunt partim ob caloris, maximè tamen doloris capitis molestiam.

*Alvum adstrictam*, (quam ex ordine symptomatum in historia morbi recensitorum durante calore evenire suppono, retinui verò ordinem sese invicem excipientium symptomatum *D. D. Köleséri*, & non nisi hinc inde plura ab aliis comunicata vel deprompta suis locis inserui) oriri existimo sponte naturæ, dum enim ob redundantem successivè in sanguinis massam indigestum chylum, Natura versus peripheriam corporis humores dirigit, ut ibidem transpressione per porositas partes attenuetur, resolvatur, circa interna verò viscera motum tonicum auget, ut hic exclusi, eo tanto copiosius impellantur, fit, ut in minori copia ad intestina admissus sanguis minorem etiam quantitatem mucaginosa materiae eo exoneret, ob cujus defectum contenta minus commodè per intestinorum canalem provolvuntur & hinc segnius longè ad exitum promoventur; Non secus atque in aliis febrilibus morbis, in quibus natura ad peripheriam corporis humores pellit, ut ibidem quidquam heterogenei ex iis vel deponat, vel ex corpore poenitus proscribat, non urinæ solum proventum minuit, sed & alvum eadem ratione claudit.

*Tuberculorum durorum* phænomenon priusquam enodem, ante omnia de subiecto, quod nodos hosce constituit, disquirendum erit, videlicet an glandulae tumefactæ, vel vasa arteriosa, venosa, lymphatica, nervi, aut denique musculorum quædam partes hos nodos forment? Glandulas esse ea de causa minus verosimile est, quod vel cutaneæ esse deberent, vel subcutaneæ, illæ esse nequeunt, quod non solum non probabile videatur eas in tam magnam molem, spatio aliquot horarum assurgere, simulque in-



durari posse, sed insuper visum necessario incurrere deberent, cum tamen nodi hi oculos subterfugiant, & non nisi tactu deprehendi queant. Hæ verò utique de genere conglobatarum esse deberent, quales tamen iis in locis, in quibus nodi comparent, v. g. (ut alias mittam partes) prope carpum in externo latere manus supra radium minime deprehenduntur. Nec arteriis vel venis nodi hi ulla cum veritatis specie tribui possunt, quod præter complures alias difficultates, tumor horum vasorum non nisi mollis esse possit, velut in aneurismate & varice, nodi autem hi duri sunt. Multo minus pro vasis lymphaticis verosimilis ulla militat ratio, tametsi enim facile forte in tumorem assurgere possent juxta valvulas, tam subito tamen indurari contentam lympham, & vasa ipsa tantum robur adipisci posse, ut fortem Hungarorum frictionem sine disruptione sustinere queant, vix quisquam admiserit. Nervos supponere vellet, esset contra eorum naturam, qui vel compressi aut ligati non intumescunt: proximius itaque ad veritatem me accessurum confido, si subjectum horum nodorum eam cum primis musculorum extremam constituam partem, quæ initium tendini præbet, id quod suadere mihi videtur tum locus in genere nodorum, deprehenduntur enim in musculo tendinoso partibus nostri corporis, innuentibus hoc *D. Bacsmegyi*, *Conterraneis*, ex parte *Geigero*, *Reimanno*, tum in specie nodi illi notissimi circa carpos manuum, quos veluti reliquias ab hoc morbo sub nodorum forma, conterranei olim sæpius ab eodem vexati, mihi in manu sua ostenderunt, hi enim nil aliud sunt, quam musculorum pollicis extensorum extrema in tendines jamjam terminatura, quæ etiam in sano statu & non solum apud Hungaros, sed omnes peregrinos quoque tactui nodos æmulantur, atque quisque in manu sua eosdem, videlicet 1. vel 2. pollices transversos supra carpum in externo latere manus, supra radium (scilicet è regione pollicis) offendere potest, si paulo durius premendo ducat ver. gr. pollicem alterius manûs non nihil à carpo versus flexuram cubiti; id tamen monuerunt Conterranei hos nodos sub morbo Csömör majores evadere. Notandum insuper duco, iisdem Conterraneis docentibus nodos palpabiles non ubique in eodem subjecto eandem habere magnitudinem, sed alios magis,

alios



alios minus protuberare, unde aliqui etiam non nisi hos nodos, circa carpos manuum & spinam dorsi occurrentes, mihi nominare poterant. 2. Quod nodi non mox initio morbi appareant ita increti, sed post complures demum horas, quod *D. D. Moller* etiam innuere videtur, dum dicit vomitus salutare esse, si ab initio mox morbi contingant, antequam nodi appareant & æstus incrementum sumat, ut adeo non nisi sub æstu eos increfcere probabile sit; Quibus præmissis facile conceptu esse arbitror tubercula hæc ea ratione efformari, quatenus extrema fibrarum muscularium in tendines terminantia sub æstu magis distenduntur, quæ cum alias etiam & majorem duritiem, & pressâ majorem dolorem, quam medius musculorum venter exhibeant, nil mirum dura hoc in morbo quoque apparere & fortiter pressâ exquisitum dolorem ciere. Non difficilis etiam esse potest ratio, cur pro diversitate subjectorum majora vel minora deprehendantur hæc tubercula? quod videlicet pro ratione ætatis, magnitudinis personarum, & temperamentorum magis vel minus torosæ esse soleant musculorum fibræ. Cur verò in iis majora tubercula deprehendantur, qui sæpius frictione morbum hunc profligarunt, in præsens non determinabo, cum nesciam an etiam extra morbum majores nodos exhibeant, in iis enim, qui in manu nodos mihi ostenderunt, modo æquales meis, modo majores erant, differentiæ ratio tamen illicò patebat, quod hi torosiores etiam me fuerint. Nec tubercula circa tempora impræsentiarum explicanda in me suscipiam, cum alii eadem negarint, alii qui in nonnullis ea deprehendi audiverunt, locum in specie certo determinare non potuerint, an videlicet superius prope bregmatis ossa, vel alibi observentur, quæ de causa certi quid elicere mihi non licuit: Ex hac mea tuberculorum explicatione justâ consequentiâ inferre quis possêt, tubercula hæc in aliis quoque morbis & in aliis regionibus deprehendi debere, cui utique non refragabor, tanto quidem minus, quod *D. D. Reiman* scribat *D.* matrem suam lumbagine rheumatica detentam cum horrore prægresso & calore insigniori ostendisse in dorso palpantibus similes protuberantias. *D. D. Gensel* verò testetur se in Italia quoque aliquoties vidisse hujusmodi nodos, licet in quibus morbis, non commemoret. Quod



verò hætenus non observati sint paulo curiosius, suspicor inde provenisse, quod frictionis usus tantus hodie non amplius vi-  
geat, à Veteribus verò frequentius frictionibus utentibus sponte  
illorum neglecti sint annotari.

Hætenus paulo prolixius explicationem dedi Symptomatum  
morbum hunc concomitantium, subnectam brevibus reliquo-  
rum præcipuorum phænomenorum in historia enarratorum e-  
nodationem.

*Cur itaque famelici, & post prægressum jejunium, homines fre-  
quentius huic morbo obnoxii fiant?* evidentem arbitror esse causam,  
quod hi ipsi tanto procliviores sint ad excedendos temperantiæ  
limites, latrans quippe stomachus rarò patitur sibi præscribi le-  
ges, unde vel præcipiti ingurgitatione, vel mole nimia lauda-  
bilium aut difficilium etiam concoctu ciborum facile ventricu-  
lum onerant, fomitemque huic morbo succendunt.

*Quod cholérico & cholérico melancholico temperamento familiarior  
sit hic morbus,* tribuo indoli animi eorum, hi ipsi enim, uti  
circa moralia non patiuntur facilè impunè objici sibi impedi-  
menta, omnesque nervos ocyus intendunt ad amolienda ea, ita  
pari quoque ratione sese gerunt circa actiones vitales, eadem enim  
anima est, quæ rationales & quæ vitales perpetrat actiones,  
unde hæc ipsa temperamenta quoque in genere febribus ma-  
gis obnoxia sunt, teste *Cel. Stablio in Diss. sua de febris historia  
in genere.*

*Quod peregrini in Hungaria commorantes nunquam vel solum ra-  
rissimè corripiantur hoc morbo,* mirum videbitur iis, qui Coberi  
scripta evolverunt, is enim morbo huic plurimum militum in  
Hungaria mortem, quam qui hostilibus ceciderunt armis, ad-  
scribit, videtur tamen in eo confudisse febrim strictè dictam  
hungaricam cum hoc morbo, nam illa utique non solum fa-  
miliarior est peregrinis quam indigenis, innuentibus id *D. Mol-  
lero, Raygero,* sed deleterior quoque illis præ his, teste *D. Mol-  
lero.* Non diffiteor interim, sæpius sanè febrim sic dictam  
hungaricam morbo huic vestigia legere posse in castris, cum  
non solum commodissima illic occasio sit suscitando huic mor-  
bo (& quidem peregrinis, si non major, cum ipsimet non fa-  
cilè extra castra divagentur pro more Hungarorum, ut magis  
salu-



salubria conquirere possint edulia, tamen æqualis) qui demum neglectus, præcipuè aliis causis simul concurrentibus in febriem illam degeneret peregrinis imprimis periculosa; verum ipsemet *D. Köleséri* id indigitare videatur in *Præfatione sui tract. de Scorb. Medit.* Ut adeo de infrequentia hujus morbi dicta sumenda existimem non nisi de illis peregrinis, qui in Civitatibus agunt, hi enim cum forte in cibis majorem temperantiam sectentur, quam Hungari ibidem nati, & hinc minus frequentem fomitem suppeditent huic morbo, rarius etiam eidem obnoxii vivunt, aut si æque intemperantes essent, & tamen rarius eodem corriperentur, adscriberem id peculiari Hungarorum indoli præ aliis gentibus, quod sicut alias in moralibus facile offendi soleant, ita nec in vitalibus facile ferant ulla molestias, qualis animi habitus cum in peregrinis non adsit, facilius etiam vitia concoctionis tollerent.

Quæ duo, videlicet temperantiæ studium majus & animi mores magis compositi, cum apud *Germanicæ & Slavonicæ Nationis Hungaros*, nisi fallor, deprehendantur, iis etiam ea de causa rarius evenire morbum hunc auguror, quam strictè dictis Hungaris.

Cur verò in illis, qui sæpius morbum hunc perpessi vel ob leves dietæ errores repullulet? cum materiæ minus proportionata hic subsit conditio, longè verius credo hanc repullulandi proclivitatem Naturæ æstimationi adscribi posse, quam cuicunque tandem materiali vitio, quæ cum sæpius circa digestionem primam molestias passa sit, eas verò sive vomibundis, sive alvinis excretionibus, aut denique transpressione per porosas partes auspicatorum superavit, non modo cautior inde facta vel à levioribus erroribus dietæ sibi metuit, sed etiam eandem motuum repetit scenam, ut in herba adhuc quasi suffocet, & præcaveat ulteriora damna: Tela enim prævisa minus nocent.

Cur verò initio neglecto malo, nec adhibita ulla medicatione, spontaneis etiam excretionibus emanantibus febres intermittentes vel continuæ succedant? ratione febrium intermittentium quidem manifestus intercedit nexus, inter causam materialem illarum & hujus morbi, cum enim utrique hi morbi circa primas vias collectas cruditates pro causa primaria habere soleant, facile reliquæ hujus morbi, illas provocare poterunt. In continuas  
verò



verò & imprimis febrim hungaricam transformationem hujus morbi, non quidem unicè ab hac causa materiali primarum viarum derivandam esse existimo, sed concurrere eo tum alias quoque causas suspicor, v. g. ex transpiratione sive ante morbum, vel sub hujus morbi febrilibus motibus suppressæ, collectas subtiles salino sulphureas acres particulas, quæ cum agilissimi motus & certo respectu fermentativo putredinosæ efficacix sint, facile inde continuis aut ipsi feбри hungaricæ materialis fomes suppeditari potest, prout videmus alias ephemerarum species ob sudorem & transpirationem cohibitam in continuas putres degenerare. *Vid. Forestus l. 1. de febr. ephem. obs. 3. in scholio.* In aliis verò cum lassitudo, inappetentia & alvus adstricta remanere scribantur, equidem ea moveor suspicione, quod fortè alia symptomata simul concurrant, & febricula quædam lenta subsit, si tamen non nisi hæc allegata essent, indicium foret Naturam tædio quasi captam esse ad vegetiores denuo motus suscipiendos pro expugnandis vitiis illis circa concoctionem, eo quod prioribus suis conatibus operæ pretium non fecerit ob refractariam materiæ conditionem, unde jam non nisi successivæ correctioni materiæ studeat, & ne nova sibi impedimenta objiciantur, sponte aversetur novorum ciborum ingestionem, simul verò ab activitate circa movendos artus remittat, ut illi suæ intentioni tanto majori studio non distractis viribus incumbere possit, unde *Lassitudo* & *Inappetentia*, cumque lassitudine pressi rarò motus suscipere soleant corporis, ex sedentaria vita, & ob motûs defectum, necessario segnitics alvi induci debet. *Tantum de phœnomenis.*

Ordinis ratio exigeret, ut nunc signa diagnostica & prognostica, non minus causas traderem, sed cum illa in Historia morbi exhibeantur, de Causis verò jam supra in evolutione definitionis, occasione sic ferente egerim, actum agere mihi viderer, si hic denuo easdem recoquerem. *Ad Curationem* itaque me conféro.

Antequam autem ipsemet curationem subnectam, lubet de populari Hungarorum curatione pauca monere, consistit illa in 4. veluti remediorum generibus, frictione sc. abstinentia à cibis, motu corporis vehementiore & spirituosorum assumptione, quæ



quæ subinde ita invicem subordinare solent Hungari, ut abstinentes à cibis simul vel frictione utantur, vel spirituosâ assument, vel motus corporis instituant, vel ab omnibus simul melam poscant.

Ad frictionem verò in specie quod attinet, validam eam instituunt, & cum acetô alliatô, piperatô, ut plurimum adornari soleat, *Coberus, Köleséri & Vindisch* rebus hisce, quibus administratur, unicè fere curandi partes deferunt, ob earum acredinem atque particulas salino sulphureas, quarum odore fuligines cerebri dissipari *Coberus, D. Köleséri* verò & *Vindisch* stagnantes in extrema cute humores crassos incidi & resolvi volunt. Disuadet tamen, quo minus ea ratione frictionem opem ferre credam, frictionis cum pinguedinibus acrimoniæ sensibilis expertibus institutæ par efficacia, quâ inducor ut credam ipsi frictionis actui meliori jure primas curandi partes decernendas esse, quam rebus illis, cum quibus ea instituitur, licet & has symbolum quoddam secundariò conferre negare nolim; rationem autem, qua frictio subinde profliget morbum, antequam tradam, juvabit præmittere & supponere, 1. ex historia morbi, non semper frictionem eum habere usum, ut vel morbum hunc tollat, vel alios subsequuturos averruncet. 2. frictione cieri affluxum humorum ad peripheriam, quod uti à priori ratio dicitur, quatenus pressione muscutorum sanguis ex fibrarum muscularium interstitiis in venas reprimatur, eâ verò remittente ex arteriis in evacuatos poros copiosius admittitur, ita à posteriori quoque ex effectu confirmatur, quod videlicet juxta Contraneorum relationem post frictionem magis incallescere observetur corpus; cui scopo etiam favet apud nonnullos Hungaros receptus mos, ut partes frictioni submittendas v. g. dorsum, brachia foco ardenti obvertant, & post frictionem lectum petant pro promovendo hoc affluxu, & si fieri possit proliciendo sudore: Non minus ipsæ res, quibus frictio administratur, illud suadent, cum vel emolliendi fibras efficaciam vel acredine sua ad affluxum humorum provocandum apta & idonea sint: Quibus præmissis judico frictionem ea ratione abigere hunc morbum, quatenus affluxum humorum versus peripheriam provocando (quem Natura sibi relicta pro concoctione juvanda magis versus interiora cieri in animo habet) Naturam à propo-



to suo avertit, eodem sc. modo, quo in aliis morbis v. g. Variolis, ubi Natura ad habitum corporis materiam morbificam expellere conatur, dato alvum proritante medicamento, à prioris sua intentione avocatur, atque ad intestina copiosius humores pellit, licet hic ob materiam morbificam magis activæ & noxiæ efficaciz æque impune non ferat hanc sui seductionem, ac in morbo Csömör, cum hic longiori mora adhuc sensim sensimque corrigi queant concoctionis vitia, imprimis si abstinencia à cibis & spirituosorum assumptio simul in subsidium vocentur, quibus si non cedant cruditates & refractariæ magis sint, sive ob molem, aut viscidam nimis tenacitatem, aliamve earum qualitatem pravam, nihil utique frictione obtinetur, ut vel morbus hic cesset, vel alii subsequuturi morbi præcaveantur: Et cum alias quoque non rarum observatu sit circa actus Naturæ, eam à semel cœpto proposito non æque facilè & uno contrario inducto motu sese pati abduci, non difficilis quoque potest esse ratio, cur frictio magis repetita & sæpius in usum vocata sine demum suo potiatur. Consimilis fere frictionis efficacia celebratur ad uvulam relaxatam restituendam in *Misc. Ac. N. C. G. D. II. An. II. obs. 56.* à *D. Job. Lud. Hannemanno*, ubi non solum adducit *Blancardum* in *Collectaneis suis Physico Medicis* mentionem facientem felicitis hujusmodi curationis per frictionem brachiorum uvulæ relaxatæ, sed ipsemet quoque suo & domesticorum suorum exemplo fidem facit, sæpius sibi & suis uvulam prolapsam hac methodo priori loco citra aliud adminiculum restitutam fuisse, admonens tempore procidentiz uvulæ exiguos nodulos sub cute in brachio 2. digitos supra pollicem deprehendi, quos nodulos uti nil aliud esse existimo, quam initia tendinum pollicis extensorum, quæ etiam alio tempore nodos fingunt, (de quibus superius) ita rationem quoque curandi eandem hic esse, quæ in morbo Csömör suspicor, cum enim uvulæ relaxatio congestionem ut plurimum humorum versus fauces pro causa agnoscat, (unde & tumor vicinarum partium eam plerumque stipare solet) frictio verò brachiorum affluxum humorum ad brachia alliciat, Natura frictione pellecta priorem intentionem deserit, & ad brachia demum copiosius humores pellit, unde cessante ad fauces majore affluxu, stagnantes humores sensim



in venas resorbentur, sublata verò sic causa distendente & emolliente fibras, hæ denuo priori tono sese restituant. Eodem ex capite frictions alibi quoque à Practicis commendari solent, v. g. iis in affectibus ubi affluxus humorum ad certam aliquam partem alliciendus est, uti in ariduris partium, ad mensium fluxum facilitandum, in pedibus; vel contra ubi affluxus humorum ad aliquam partem vel effluxus arcendus venit v. g. in hæmorrhagiis narium nimis fricando pedes vel brachia; sed de frictione nunc dicta sufficiant.

Transeo ad abstinentionem à cibis, hanc plurimis sæpe morbis remedii loco esse testatur vulgatissimum illud: Multi magni morbi curantur abstinentionia & quiete: Cur vero in hoc morbo ex usu esse soleat? vix quemquam subterfugere potest ratio, perpendendo, novos non ingeri cibos sub ea, adeoque vitia vitiiis non cumulari, secretionem verò humorum menstrualium jugiter peragi, quibus positus obvium utique est, majore menstrui copiâ facilius etiam vitia concoctionis fomitem huic morbo præbentia superari posse.

Spirituosa vero assumpta uti calorem ventriculi augendo, menstruum in activitate sua, & ventriculum in tono suo roborando, & denique pro diversitate eorum, cruditates etiam ex parte resolvendo non ultimam in morbi hujus radice succidenda merentur laudem; ita motus corporis vehementiores affluxum humorum ad peripheriam provocando, & si forte indigestæ quædam chyli moleculæ sub hisce motibus ex ventriculo intempestivè expulsæ & in sanguinem delatæ fuerint, easdem attenuando, resolvendo, morbi hujus depulsioni favent.

Ad Curationem autem Medicam, quod attinet, ex superioribus constare potest, causam hujus morbi constituere errata dietæ, quatenus digestionem eludunt; dixi insuper in antecedentibus Naturæ intentionem eam esse, ut vitia concoctionis in primis viis vel corrigat, vel ad motum prius disponendo dein è corpore eliminat, aut si jam in sanguinis massam redundarint, eorum attenuationi studeat: Hos itaque scopos Medicus pariter ceu Naturæ Minister sibi præfigere debet, si Naturæ commodas porrigere velit manus; judicio tamen opus est, an unicè



correctioni cruditatum res tota committenda sit, vel præstet evacuare eas? & si Natura ipsa motus excretorios suscipiat, an ubi non rite succedat excretio sub hisce motibus, hos augere vel materiam solum ad faciliorem exitum disponere conveniat? In genere itaque tenendum, si ipsa Natura ad vomitum inclinet sub conatibus vomendi, frustra illic propinari emetica, quia Naturæ motus vomibundi utique sufficiunt ad excutendam saburram ventriculo inhærentem, quod verò sub illis motibus nulla contingat excretio, unicè materiæ h. l. utplurimum viscidæ & tenaci, quæ à lateribus ventriculi difficulter avelli sese patitur, id in accepto ferendum est; unde majus hic operæ pretium impetratur digestivis, incidentibus, absorbentibus & diluentibus, quam novo stimulo excretorio non præparatâ ad exitum materiâ. 2. Si nullos hujusmodi motus excretorios Natura suscipiat, ingestorum qualitas & quantitas Medici quadantenus determinare potest judicium, an correctioni solum materiæ, vel ejusdem evacuationi incumbere debeat, si enim laudabilia fuerint esculenta, & solum in insufficiente masticatione erratum fuerit, nec in quantitate ingens admodum excessus commissus, vel si cibi laudabiles benè præmansi, sola forte quantitate nimia molestias concoctioni creent, Spes est utique corrigi adhuc posse hæc concoctionis vitia, adeoque mitioribus prius remediis tentari debere materiæ morbificæ subjugationem. Ubi verò refractaria alias concoctioni assumpta fuerint, & vel quantitas eorum simul concurrat, vel masticationis defectus accesserit, aut, si laudabiles etiam cibi & quantitate & præcipiti infarctu simul occasionem præbeant huic morbo, tunc uti longè minor spes inpetrandæ correctionis, ita justior quoque indicatio, eadem ex corpore proturbandi, ne paulo diutius Naturæ laborem facessant: non minus verò si alterantibus adhibitis in priori casu spei non respondeat eventus, ad evacuantia confugere licebit. Et cum tam per superiora quàm inferiora in hoc morbo utiles deprehendantur evacuationes, observatis iis individualibus circumstantiis ex methodo medendi notis, quæ usum vomitoriorum vel purgantium suadent aut disvadent, poterunt in genere, si cruditates in ventriculo adhuc stabulari indicium sit, commodius per vomitum ceu breviorẽ viam eadem rejici, vel si ad intestina jam de-



detrusas esse suspicio fiat, per alvum subducentia eliminari, aut utræque evacuationes simul in usum vocari, pro abstergendis sic ventriculi æque, ac intestinorum sordibus, subjungendo demum pro rei exigentia & circumstantiarum ratione tonum ventriculi & intestinorum roborantia aromatica, amara &c. Semper tamen in evacuationibus suscipiendis, prius materia ad motum prædisponenda remediis mox dicendis.

*Prior jam Scopus Medici np. Materiæ correctio*, impetrari potest partim salinis digestivis, incidentibus, v. g. Tart. Vitriolato. Arcano duplic. Nitro depurato, antimoniato. Sale digestivo Sylvii, vel salibus alcalicis fixis: Card. Ben. Absint. Centau. min: partim absorbentibus, v. g. Chel. Ocul. cancr. Testis ovorum calcin. Coral. præp. conchis præp. &c. partim aromaticis: Pipere. Zingibere. Rad. Zedoar. Galangæ. Cardamom. Cubebis. &c. partim amaris: ex Absint. Centau. min. C. B. Rad. gentian. rubræ. &c. partim acris: Rad. ari, Sem. synapi, erucæ &c. partim vino generoso simplici vel aromatizzato, & denique ex his nunc enumeratis paratis vel compositis medicamentis v. g. Speciebus, Pulv. stomachicis, Conditis, Electuariis, Essent. Elixiriis. &c. Ex quibus uti facile pro assumptorum qualitate magis idonea seligi, aut alia aliis pro circumstantiarum ratione invicem combinari, ita in varias quoque formulas redigi poterunt, quales hic prolixè adferre supervacaneum duco, inprimis cum hæ ipsæ Lectiori Compositionis Medicamentorum gnaro magis tædium, quam utilitatem parere soleant.

*Secundus Scopus, np. Evacuatio materiæ morbificæ*, prout monitum, aptitudinem ad excretionem prærequirit, cui fini inserviunt pro causarum diversitate tum digestiva, tum absorbentia ex jam dictis repetenda, tum denique diluentia, uti juscula esculenta v. g. cerevisia aut aliud jusculum butyro imprægnatum, decoct. avenaceum tenue, serum lactis. &c. quæ sola eo in casu ubi natura motus excretorios ciet, excretionem materiæ promonent; Ubi vero illi deficiunt, cum fructu, præmissis sic materiam præparantibus provocari poterunt, datis (ut alia prolixitatis evitandæ causa mittam) Tart. Emet. gr. j-iiij. pro subjectorum & locorum in Hungaria diversitate (vide Miscellanea Medica in fine annexa) cum Sachari, Antim. diaph. vel salis digestivi alicujus v. gr.



Tartar. Vitriolati gr. vj-viij in pulv. Aut cum Extracti alicujus appropriati v. g. Card. Bened. gr. vj-vij. in pill. pro dosi. Vel quibus spuria dicta uomitaria magis arriderent, irritatis penna vel digito faucibus, aut aqua vel lacte diluto tepido copiose ingurgitato eundem effectum experiri poterunt. *Coberus* Essentiae Rad. Asari & Raphani Austriaci aliquot duntaxat guttas laepius se efficaces deprehendisse in Hungaria testatur. *D. 11. Obs. III. in Schol.*

Si per inferiora educere consultius videatur, satisfaciet decoct. ex Fol. Sennae ʒij-vj. (pro subjectorum itidem & locorum diversitate) cum salini alicujus v. gr. Cryst. Tart. & Sem. Anisi ana ʒß-j. Aut Rhabarb. ad ʒj-3j. cum vel sine stimulo vel incidente aliquo salino. Vel Emulsio quædam ex Res. Jalap. Scammon. gr. vj-xiij. Amigdal. dulc. excortic. aut vitel. ovorum q. s. Aquæ denique Ros. Cinam. vel alius appropriatæ q. s. v. gr. ʒiß-ij. parata & edulcorata, ut Mercur. dulc. & alia æque commode & tuto intestinorum canalem abstergentia & evacuantia, tam simplicia quam composita, variis formulis inservitura taceam.

Evacuata verò sic materia morbifica, si necesse visum fuerit, nec circumstantiæ aliæ diversum suadeant, inprimis post emetica propinata, subungere mox licebit aromatica, amara stomachalia, vinosa, inprimis vinum ustulatum cum aromatibus v. g. cariophyll. macere. cardamom. cort. cinamomi &c. quæ tam ventriculum roborando, quam relictas forte adhuc cruditates resolvendo ex usu esse poterunt. Atque sic paucis duplici indicationi prospectum esset.

Restat, ut Tertiæ quoque paucis satisfiat, si videlicet febrilia emicent symptomata, quæ cum salutare Naturæ motus sint, ad attenuandas viscidas chyli particulas in sanguinem delatas suscepti, circa eos quidem vel augendos, vel imminuendos, Medico nil temere suscipere fas est, ne demum serò facti poeniteat, magisque continentia tranquilla, cum temperato regimine & sufficienti injuncto potu cerevisiæ tenuis, feri lactis, vel Decocti hordei cum Rad. Fœnic. Scorzone. pro diluendo sanguine simul, proderit, quam varia calida, urinosa, opiata, theriacalia, utpote motibus naturæ rectè procedentibus perversis



tendis magis quam gubernandis accommodata; Est enim febris hæc sibi relicta omni modo benigna: Si tamen quædam propinare placeat, conducent salina media supra allegata cum fixis diaphoreticis & pauxillo cinab. v. g. Antim. diaphor. Conchar. præp. Arcani dupl. ana, gr. vii. Cinab. nat. gr. iij. in pulvere, vel cum Aquis diaphoreticis v. gr. Scord. Card. B. Fl. Sambuc. (aucta non nihil pulverum dosi) in Potiunculæ forma, edulcoranda. Aut Mixtr. Simpl. non camph; vel Essent. Bezoard. Stahlian; aut, si hæc non habeatur, Essentia ex Rad. Helen. Vinctox. Pimpin. alb. Hb. Scord. & aliis lenioribus alexipharmacis, simul tamen materiam viscidam incidentibus, & secretiones per urinam ac diaphoresim promoventibus parata &c. quæ postrema spirituosæ, imprimis tepescente jam æstu majorem spondent efficaciam, si ad gr. xx. xxx. &c. propinentur.

Hisce hætenus dictis præservationis fine ab hoc morbo adhuc breviter superaddi potest, ut sive æveti jam huic morbo, sive minus, temperantiæ studeant, fercula difficilioris concoctionis, quibus facilè offendi sese deprehendunt, quoad fieri possit, vitent, & non nisi benè præmansos cibos deglutiant: Æveti verò seorsim meticulosas & scrupulosas nimis cogitationes circa qualem qualem sensum alterationis post assumpta esculenta animo excutiant, & quibuscunque gratis sive colloquiis, sive aliis mentem diverstant, ne indulgendo nimis meticulosis ideis tanto promptius morbum hunc incurrant. Atque sic coronidem inpono, Deoque T. O. M. pro clementer concessis ad institutum hocce exsequendum viribus, devota mente persolvo grates. Tu verò Lector Benevole, si quæ errata in nunc dictis animadverteres, ea pro humanitate tua excusabis, & si quidem rectiora nosti, candidè monebis, quod non solum non ægre feram, sed obstrictum quoque me tibi ex eo profitebor, probe gnarus, non eam Intellectus nostri esse certitudinem, & scientiæ perfectionem, ut nil desiderari queat, quin imò dum mens maximè sub veritatis specie sibi ablanditur & applaudit, sæpe eam falli,

S. D. G.

Se



*Sequuntur Miscellanea quædam Medica in Hungaria observata, & ex Responsionibus Celeberrimorum Hungariæ Practicorum D.D. Raygeri, Molleri, Genselii excerpta, Curiosi Lectoris in gratiam Dissertationi annexa.*

1. Crises in Hungaria verè exquisitæ observantur frequentes in febribus acutis continuis, sed vel sibi relictis, vel non male tractatis, & quidem pro ratione causarum variæ, nempe: vel per diarrhæam 4. & 7. die, vel per sudorem 7. & 9no. In continentibus, imprimis in subjectis junioribus, per hæmorrhagiam narium 4. & 7. die, & interdum 11. sed non ita commodè. In Inflammationibus cum febre, non ita exactæ crises observantur, excepta Peripneumonia, in qua sæpius septimo die largo sudore totum malum intra paucas horas solvitur. *Mollerus*. Rarius fiunt Crises per vomitum & urinam, & utplurimum imperfectæ. Contingunt quandoque salutare crises etiam intercalariis diebus, octavo tamen & decimo utplurimum funestæ, imprimis nocturnæ. Metastases etiam frequenter observantur. *Gensel*. Per sudorem, quæ contingunt, frigidum utplurimum totius corporis sudorem sistunt. *Raygerus*.

2. Medicamenta in Hungaria magis conferunt temperatiora, mitiora, & diffusas vires habentia Galenica, quam calidiora, volatilia salina, spirituosæ & alia Chimica concentratas vires possidentia, ob clima calidius, & vini generosi, piperatorum aliorumque aromatum abusum teste *Raygero*, *Genselio*, & *Mollero*.

Prout in febribus quoque acutis positiva sudorifera calidiora iidem inprobant, & contra fixiora terrea, nitrosa utilia esse dicunt.

3. Doses alterantium imprimis volatilium & opiatorum minores esse debent in Hungaria quam in Saxonia teste *Mollero*. Secundum *Genselium* circa Sopronium opiata utplurimum vomitum causant, & salia volatilia non nisi in refracta dosi propinari amant. Opiatorum & salium volatilium usum cautum admodum esse vult *Junior Raygerus*, id quod *Senior* etiam, dum viveret, *Raygerus* in Scholio suo ad Obs. 47. *Spindleri* monuit.

4. Emetica Hungari pro varietate morborum benè ferunt, etiam largiori dosi propinata, exceptis fœminis; & Purgantia  
ni-



nisi sint vehementiora, nihil operantur secundum *Genselium*. Secundum *Mollerum* verò tam Emetica quam Purgantia draastica, aut in majori dosi exhibita pessimos neruosi generis affectus post se trahunt. *Raygerus* dicit Purgantia melius ferre Posonienses, quam Emetica, quæ apud eos in usum non trahuntur, quia naturâ perferre non possunt, in castris tamen in febribus intermittentibus æque ac continuis statim ab initio cum fructu propinari. *Reimannus* in sua epistola vomitoria mitia & parcissima in dosi, purgantia verò majori in dosi quam Jenæ conferre dicit. In infantibus & gravidis vomitoria & purgantia *Raygerus* & *Genselius* vitanda volunt; *Mollerus* non nisi mitiora, non Antimoniata, Mercurial. ex usu esse dicit. Clysterum usum *Genselius* & *Raygerus* frequentem esse dicunt in suis partibus, *Mollerus* autem in suis rarum dicit, ubi tamen adhibentur, optimè conducunt, inprimis infantibus & foeminis hystericis.

5. Venæ sectiones nec infantibus, nec senibus in Hungaria administrari solent, teste *Mollero* & *Raygero*; In Variolis, Exanthematis ante eruptionem usum quidem habere solent, neutiquam tamen iis jam erumpentibus, monente *Genselio*, *Raygero*, *Mollero*, qui postremus in statu earum spontaneas quoque sanguinis excretiones funestas semper esse dicit, imò in febribus continuis epidemicis observavit idem omnes, qui quocunque morbi tempore, etiam in statu eximiè plethorico constituti V. S. adhibuere, certissimè mortuos esse. Pleuritis vera etiam commodius sine V. S. curatur, quam illa adhibita, nisi status summe plethoricus urgeat, quo in casu, non nisi 1. vel 2. die administrata prodest, teste *Mollero*, *Raygero*; *Genselius* omnes absque venæ sectione curat, pluresque observavit cum, quam sine Venæ sectione mori.

6. Hirudinum usum rarum in Patria esse, *Raygerus*, *Genselius* & *Mollerus* exponunt, nisi quod 2. priores in dolentibus cœcis hæmorrhoidibus & cephalalgia atrociori eas applicari testentur: postremus verò efficaciam earum, ubi ubi adhibitæ fuerint, semper bonam fuisse fateatur.

7. Trepanatio ut & aliæ difficiliores chirurgicæ operationes ob raros peritos chirurgos, rarius in usum vocantur, inprimis tempore pacis, teste *Raygero*, *Mollero*, *Genselio*, alias feliciter ferunt



trepanum Hungari secundum *Raygerum*.

8. Phthisis non tam frequens observatur in Hungaria atque Anglia teste *Raygero*, *Genselio*, imò rarus in Hungaria morbus est secundum *Mollerum*. Rachitis secundum *Raygerum* & *Genselium* infrequens morbus est in Hungaria, *Mollerus* tamen in 2. & 3. Annorum infantibus frequenter eam observavit. Febres malignæ sudatoriæ in Anglia frequentes, à *Mollero* non sunt observatæ, à *Raygero* rarò. Plicam Polonicam in Hungaria *Genselius* & *Raygerus* non observavit, *Mollerus* dicit occurrere eam in confiniis Poloniæ, licet non tam frequenter ut in Polonia.

9. Febres intermittentes simplices tam quotidianæ, quam tertianæ & quartanæ frequentes sunt in Hungaria, testante *Genselio*, *Raygero*, & *Mollero*, licet tertianæ frequentissimæ secundum hunc. Intermittentes duplicatæ rarius à *Genselio* observatæ: Tertiana duplex à *Raygero* sæpius: *Mollerus* verò dicit per 5. annos epidemicè grassatas esse intermittentes duplicatas, & quidem vere tertianæ duplices, autumno quartanæ duplices. In intermittentibus calor ferè semper frigus excedit teste *Mollero*, *Genselio*, *Raygero*.

10. De morbis epidemicis & eorum curatione, quæ *Sydenhamius* annotavit, imprimis quod diversæ annorum constitutiones, diversas quoque indicationes & remedia exigant, *Mollerus* à 15. Annis in Hungaria quoque ita se habere observavit. Epidemicos verò morbos, qui annuatim in Hungaria grassari solent *Genselius* recenset petechias, variolas & morbillos, mense Martio & Aprilli frequentes, diversa ob symptomata pro annorum constitutionibus diversas quoque indicationes & remedia poscentes. *Raygerus* pariter exanthematicos morbos adducit æstivo & vernali tempore grassantes, & per 3. Annos cum ingressu veris Pleuripneumoniam epidemicam observavit: frequentissimas tamen ex exanthematicis esse petechiales consentiunt *Genselius*, *Raygerus* & *Mollerus*, qui postremus eas dicit post hyemale solstitium atque ante & post æquinoctium vernale epidemicè grassari, sine discrimine ætatis, frequentius tamen sanguineos & cholericos, rarius melancholicos corripere. Febres catharrales secundum *Genselium* ut plurimum hyeme epidemicè grassantur, sub quarum larva petechiales sæpe latent, lethales

sæ-



ſœpius, niſi ſuccurratur tempeſtivè. A *Mollero* autem ab An. 1710. ad 13. catharrales malignæ petechiis comitatæ epidemicæ fuiſſe dicuntur, & quidem circa æquinoctium vernale, & ſolſtitium æſtivale, uſque ad æquinoctium autumnale, quæ nec regimen, nec medicamenta calida ferebant.

11. Dantur & particularia Hungariæ loca, in quibus uni præ alio morbo frequentius obnoxii vivunt Incolæ. Sic non modo popularis rumor in Hungaria fert de Cremniciensibus, eos frequentibus ſtrumis laborare, ſed & *Mollerus* idem confirmat tam de civitate ipſa, quam territorio Cremnienſi, cauſam rejiciens in aquas ſabuloſas (*Rieſichte Waſſer* vocant) ex fodinis metallicis promanantes. Idem de Leucſoviænſi urbe *Reimannus* affirmat, (tameſi egomet non recorder me tam frequentes & grandiores ſtrumæ illic offendiffe ac Schemnitii vidi in metalli foſſoribus) ipſe cauſam Leucſoviænſium ſtrumarum refert in aquas montanas limoſas, quales Conterraneus quoque inde oriundus mihi teſtabatur, quod ahenea vaſa, in quibus aliàs aqua decoqui, & pro variis uſenſilibus abluendis prompta aſſervari ſolet, ſenſim ſenſimque calcaria limoſa materia incruſtentur. Verus quoque eſt rumor de Caſſovia teſte *Mollero*, *Raygero*, peregrinos paululum commorantes illic, febribus corripiri non ſolum intermittentibus, ſed & continuis acutis, à quibus ſemel vel bis liberati dein immunes vivunt, cauſam prior aëri jugiter nebuloſo & craſſo adſcribit cum crebro uſu vinorum generoſorum. Idem *D. D. Moller* Neſolii quoque per totum annum frequentiffimas febres graſſari dicit, in cereviſiam craſſam, crudam & ſaturatam, non minus aërem ex fumo carbonum, qui circa civitatem cremantur, & minerarum cupri exhalationibus, quæ illic torrentur & præparantur, infectum, culpam devolvens.

12. Arthritis in Superiori Hungaria frequentius vaga infeſtat, quam fixa, ob vina generoſiora, minus tartari feracia, quæ nec doliis tartarum affigere ſolent, teſte *Mollero* & *Reimanno*. In Inferiori vero Hungaria frequentius fixa obſervatur quam vaga, iſſdem aſſerentibus, licet *Genselius* utraſque frequentiffimas eſſe dicat, deprehenduntur verò hic vina magis tartarea, monentibus *Mollero*, *Reimanno*, *Genselio*, qui poſtremus omnia



fere vina ibidem doliis tartarum affigere dicit, inque mensa effusa maculam gypseam & calcariam relinquere; (præter Sixsardientia & Somloyensia, quamvis nec hæc plane tartari expertia sint) Idem ipse asserit post paroxismos ordinariè topbos illic relinqui. Coëteroquin in genere Artritidem tam vagam quam fixam in comparatione causarum pro illis excitandis vulgo suppositarum satis raros affectus esse dicit in Hungaria *Mollerus*, infestantes subjecta sanguinei & spongiosi corporis habitus, & utplurimum *Genselio*, *Mollero*, *Raygero* observantibus circa æquinoctia dolorum faces succedentes, licet *Mollerus* etiam tempestatibus humido frigidis, prægresso errore in Diæta, vel animi passionibus, tragœdiam suam ordiri eas deprehenderit. Juniores artritidis vaga, annosiores, nisi hæreditarium sit malum, podagra utplurimum corripit, teste *Mollero* & ex parte *Raygero*. In Paroxismo Balsamum Carpaticum, Krumbholz öhl Germanis nuncupatum, absolutè noxium observavit *Mollerus*, consentientibus etiam *Genselio* & *Raygero*.

13. Calculus tam renum, quam vesicæ non est adeo frequens in Hungaria, testibus *Mollero*, *Raygero*, quorum primus frequentiore renum esse dicit præ vesicæ calculo, minus tamen familiaris calculus illis est, qui aqua vel cerevisia utuntur, benè verò qui vino meraciori indulgent, observante *Genselio*, *Mollero*; Balsamum Carpaticum internè exasperare magis calculum quam ex usu esse solet, consentientibus *Mollero*, *Genselio*, *Raygero*, *Reimanno*. Cum nunc bis mentio facta sit Balsami Carpatici, pauca tamen, quod sciam de eo apud Authores prostant, (præter *Raygerum* enim *Seniorem* in *scholio ad Obs. 58. Spindleri*, ubi pauca de eo exponit, & *Misc. Acad. N. C. Germ. D. I. An. II. Obs. 28. in scholio*. ubi nomen fere tantum ejus habetur, nullibi recordor me quidquam de eo offendisse) non ingratum Benev. Lectori futurum spero, si quæ de eo ex Patria accepi, comunicavero, cum idem non solum per Hungariam magnis encomiis circumferatur, sed Viennam usque *D. Reiman* deportari scribat: Primo itaque ab Amico *D. Georgio Bucholtz*, *Rectore Nagy-Palugyensi* communicata hæc sunt; (quæ ipsius verba sunt) *Balsamum Hungaricum*, vel etiam *Carpaticum* dictum, Oleum est destillatum ex *Ligno Curvo*, Germanis *Krumbholz* / *Schla-*



vis *Rosodreva* dicto, (de quo inferius plura) cujus rami viridiores præprimis in summitate glandulas habentes una cum foliis frustillatim dissecantur, dein vesicæ, sive ollæ destillatoriæ injiciuntur, atque aquâ superfusâ, oleum modo destillatorio extrahitur, quod aquæ supernatans ab eadem separatur; aqua vero destillata loco balnei usurpari potest, quod multos homines morbis inveteratis laborantes sanitati pristinæ certò restituit. Inventor olei illius erat *Med. Doc. Christianus Augustin. ab Hortis Ferdinandi III. Imperatoris Medicus & Aulæ familiaris, nec non Regiæ Liberæque Civit. Kesmark Archiater Ordinarius*, qui circa Annum 1640. Carpatum conscendens, oleum hocce primus ibidem destillavit nemini antehac cognitum. Idem Dominus Inventor Dominae Novercæ meæ Parens exstitit, & à Sac. Cæsar. Reg. Majestate Libertate Nobilitari Hungarica (siquidem Silesius Nissâ oriundus erat) gratiosè donatus est. *Usus internus*, si pro dosi una 7. aut 9. plus minus guttulæ sumantur, pro ratione videlicet Personæ, ejusque Naturæ in liquore aliquo convenienti v. g. vino vel spiritu vini, rarius jusculo, mane jejuno stomacho, & vesperi 2. ad minimum post cœnam horis, est sequens.

1. Obstructiones hepatis & renum potenter aperit, & hypochondriacum malum arcet.
2. Impuritates sanguinis sine molestia per copiosas urinas & paucos sudores è profundo etiam venenoso genere elicit, alvumque levat.
3. Arenas & renum calculos confringit & pellit.
4. Menstrua & hæmorrhoides movet.
5. Gonorrhæam & catharros frigidos sistit.
6. Dolores capitis inveteratos discutit.
7. Tussi etiam & inveteratis pectoris morbis, nominatim verò Phthysi & Ulceri Pulmonum optimè medetur.
8. Punctiones laterum internas sedat, si internè 10. guttæ sumantur, externe autem 20. gt. latera dolentia inungantur, calidisque linteamentis tegantur.

*Externus*, 1. Omnia vulnera recentia, si non nimis magna sunt aut profunda, in spatio 24. horarum sine ulla suppuratione & notabili cicatrice sanat; majora verò vulnera intra triduum aut quatrimum, si solummodo aliquot guttulæ instillantur, debet verò linteum ceratum ad instar Eniplastri superinponi, quò vulnus operiatur, aliàs oleum evaporat, virtutemque amitteret.

2. Scabiem in facie & capite infantum humidam intra triduum funditus ex-



ficcat & tollit nullo relicto vestigio aut cicatrice; item humiditates aliæ, ex quibus proveniunt pustulæ, facer ignis, scabies aliaque ulcera in facie, capite, vel pone aures intra 6. vel 7. dies tolluntur & sanantur, si locus affectus oleo illo leniter tingatur. 3. Ulcera antiqua, serpentina ulterius & exedentia, qualia plerumque sunt in cruribus per spatium 2. septimanarum, si modo illinantur, linteumque ceratum superinponatur ex fundamento sanat, debent autem inungi loca infecta ter de die, mane videl. meridie ac vesperi. 4. Frigidis etiam fluxionibus, sanguinis concrecti retentionibus, tumoribusque, ex quibus plerumque paralytis aut contracturæ nervorum diuturnæ oriuntur, ad miraculum tollendis efficax est, quæ omnia intra 2. plerumque septimanas restituit. In summa, tam internè, quam externè sine periculo contra multifarios morbos tanquam Panacea adhiberi potest: unde oleum hoc ab Imper. Ferdinan. III. qui virtutes ejus medicas, efficaciamque sentiebat, Balsamus Hungaricus non immeritò dictum est. Observandum autem, ut oleum illud purum aquiratur, nam communissimè adulterari solet per Piccam, præsertim à Turociensibus oleorum circumforaneis. Si velimus ne destillat. oleum citò amarescat, sed in suavitate sua recentique sapore & odore diutius conservetur, recondendum est in locis opacis & frigidioribus, siccis tamen & non humidis. Tantum ille. Forte & mihi missum ex Patria æstivo tempore in itinere suavitatem suam exuit, & *Raygerus* simile olim degustavit, nam odore & sapore meum (quantum recordor,) Oleum Therebinthinæ æmulabatur, pariterque *D. Raygero* simile se præbuit, volatilius tamen nonnihil Oleo Therebinthinæ esse videbatur mihi. Præter nunc enarratas vires in alio germanico M. Sto. mihi ab amicis transmissio celebratur ejus Virtus etiam internè in ventriculi vitis & febribus, externè in podagra, paralyticis & spasmodicis affectibus. An verò undique encomiis suis par præc. internè virtus ejus deprehendatur, vel non nisi sub certis conditionibus laudabilem aliquem usum exhibeat, uti ratione posterius suspicor, ita ulteriori experientiæ commendo. Hoc scio Celeb. *D. D. Schleuogt. Prof. Jenensem*, Patronum, Præceptorem & Hospitem olim meum debitâ semper observantiâ colendum quon-



quondam coram me mentionem injecisse, se feliciter olim Balsamum hoc in exulceratione vesicæ internè foeminæ cuidam propinasse. *D. Mollerus* verò testatur externè in contractura, paralyfi & nervorum frigidis affectibus laudabilem præstare efficaciam. Arboris jam ipsius, ex cujus summitatibus destillari solet hoc oleum habitus hic est, ex *D. D. Reiman* & *D. Bucholtzii* descriptione: Folia habet tenuia, rigida, gemina semper ab una vagina vel theca exeuntia, majora & longiora quam in abiete, incano virore nitentia; Conos duriores, magnos, sub quorum squammis nuclei bini delitescent; Ramos (qui vel minimum læsi, resinofum quid plorant) prope terram circumcirca emittit aliquot ulnarum spatio protensos, ita invicem contortos & complicatos, ut si accidat equum aut bovem inter eos incidere, non facilè inde explicari queant, faciliusve crura frangant: quin & hominem supra eos transeuntem nimis circumspectum esse oportet ne inter ramos & rupes incidens vel colum luxet, vel pedes frangat, crescit in elevationibus montium carpatiorum jugis inter rupes & saxa, omni anni tempore virens, ita ut inanimadvertenter deciduis vetustioribus nova protrudantur folia, altitudine ad orgyam, crassitiè vero ad sesqui alteram spatam teres assurgit: Unde quidem facilè subscribendum reor *D. Reimanno* dicenti, Lignum *Krumbsholz* nihil aliud esse, quam *Pinum* repentem, eam sc. speciem *Pini*, quæ *Mathiolo* *Mugho* dicitur, cum is in *Herbar. suo* germanicè edito, & à *Joa-chimo Camerario* An. 1586. *Frankofurti* recuso in folio, non minus in *Commentario in Dioscorid. Lib. VI. p. m. 78.* huic ramos circumquaque à radice prodeuntes & humi repentes spatio cubitorum 10. 15. tribuat (cujus *Dodonæus* etiam in *Stirpium Histor. Pemptadis VI. Lib. V. Cap. XII.* meminit) & paulo prolixior hujus descriptio in *Flora Norinberg.* à *D. D. Volckammero* tradita in omnibus suis circumstantiis (si flores excipias, quorum non meminerunt *D. Reiman* & *Bucholtz*) cum descriptione *Ligni Krumbsholz* coincadat, virtutes etiam oleo *pini* in *Miscell. Ac. N. C. Ger. D. II. An. III. obs. 32.* adfertæ hujus Balsami viribus respondere videantur. *D. Raygerus* Senior loc. supra cit. arbitratur esse speciem *Pinastris*, quæ à *Clusio* in *Historia Stirp. Rariorum* appellatur *Pinastris pumilio Austriacus*, cum



autem Historia hæc mihi ad manum in præsens non sit, Benev, Lectorem eo remitto. Datur & aliud oleum in Hungaria destillatum ex alia specie Pini, quod *Linbaum öhl* vocant, sed cum instituti ratio non ferat de eo hic prolixius differere, impræsentiarum tacebo.

14. Hæmorrhoides in Hungaria internæ æque ac externæ, tam fluentes quam cœcæ sæpe observantur; teste *Genselio*, frequentius tamen internæ occurrunt quam externæ secundum *Mollerum*, qui vini generosi & Allii abusum sæpe fluxum earum nimium concitare dicit; fluxus earum bene succedentis utilitas & à pluribus morbis vindicatio, non minus suppressarum confectaria, sc. diversorum morborum incrementum vel ortus, eadem ratione sese habent, uti in aliis Regionibus teste *Raygero*, *Mollero*, *Genselio*. Notandum hic duco in *Ephem. N. C. D. 1. An. II. obs. 28. D. Job. Paterson Hain*, morbum quendam Hungaris familiarem tribuere, qui *Strint* ab ipsis vocetur, qui locus non mihi solum imposuit, ut inter alias quæstiones etiam de morbo *Strint* Responsum exorarim à *D. D. Mollero*, *Raygero*, *Genselio*, (neutri tamen horum quidquam sive de nomine, sive historia morbi constabat) sed & Viro Celeb. *D. Frieder. Hoffmanno*, qui in *Dec. selectiorum suarum Dissert. Phys. Medic. Diff. III. p. m. 102.* Hungaris ex eodem loco morbum *Strint* adscribit, post comparatas tamen Ephemerides incidi in *An. III. ejusdem Dec.* ubi sub finem annectitur *Annotatio ad obs. 117. An. II.* atque inter alia scribitur, prædictum *D. Hain* animadvertisse in sphalmata quædam suis observationibus *An. II. Eph. Germ.* insertis illapsa, monendo loco *Cremer*, legendum esse *Czemer*, & pro *Strint* legendum *Szüil*; verum ne sic quidem ab omni errore Typograph. vindicatae sunt hæ voces, nam loco *Czemer*, scribendum *Csemer*, de quo *Dissertatio*; loco *Szüil* vero, *Süly*: Uti autem *Szüil* Hungaris, quantum mihi constat nullum morbum significat, nec in *Diction. Hung. D. Papai* vocem hanc inveni, ita ex adverso per *Süly* frequenter hæmorrhoides indigitant, sic *D. Papai* in tract. suo medico patria lingua scripto *3 Pax Corporis intitulo* Hæmorrhoides externas vocat *külsö Süly*: internas *Belsö Süly*: cœcas, *Dagado Süly*: fluentes, *Folyo Süly*.

T A N T U M, in præsens.







